

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA MATUTUA

FEPUARI – IUNI

2024

TUSIAOGA VASEGA MATUTUA – 2024
FEPUARI 04, 2024 – IUNI 30, 2024

ASO SA – FEPUARI 04, 2024

MATAUPU: “FAIGOFIE LE AVEA MA SO'O PO'O LE A'OA'OINA MAI MEA E TUTUPU”

(Easy discipleship or learning from play)

TUSI FAITAU: Mataio 11: 25-30

SINI: Ia a'oa'oina fanau ina ia tumau i le ola feso'ota'i ma Iesu, ona faigofie lea ona ola i le olaga fa'a so'o o Iesu.

FESOASOANI MO FAIAOGA:

E ofo alofa ma fa'atalofa atu foi i a outou susuga i Faiaoga Aso Sa i le toe amatalia ai o Aoga Aso Sa o lenei tasaga fou ua tatou aulia. Malo le folau, talitonu lava i le alofa tausī mai o le Atua o lo'o tumua'i tutusa i tatou i lana tausiga i lo outou soifua ma lo tatou ola. Manatu foi ua maua se fa'asiliga malosi e tusa o le malologa sa feagai ai ma outou. Ia tumau ai pea i le Atua lona lava vi'iga, ae saga'i ane loa aua le toe amataina o a tatou galuega o lenei tausaga ua amata. O le taugologolo lava e tupu ai manatu lelei aua outou faiva o le a'oa'o atu i fanau mo lo latou ola fa'aleagaga. Ia toe fa'amanatu i le vasega a latou api ma peni e tusi ai i lalo mataupu o Aso Sa ta'itasi. Ma 'ia tautuana ia lava pea sou taimi ma le tusi faitau ua tu'uina atu mo le mataupu. Ia manuia tele galuega o lenei tausaga.

SINA FA'ASOA MO LE MATAUPU:

O le tatou mataupu o lenei taeao, ua aumai ai le taua o le ola feso'ota'i ma le ola mafuta ia Iesu e faigofie ai ona fa'atino o tatou tiute ma le fiafia. O Iesu Keriso, o le liutino tagata mai lea o le Atua i le lalolagi o tagata. O le uiga lea o le igoa Emanuelu. Ua ia i tatou le Atua. O lona uiga la, o le valaau mai o Iesu tatou te o atu ia te Ia, o le valaau lava lea ina ia tatou o atu i le Atua ua liutino tagata mai. O le avea ma so'o moni o Iesu e le faigofie ona e tele lu'itau, peita'i a moni lo tatou ola mafuta ma fa'alagolago ia te Ia, ona faigofie lea.

O le tatou tusi faitau, e tolu ni vaega taua o lo'o aumai ai e tusa o fetalaiga a Iesu. Muamua, o lo'o fa'apea mai ai Iesu, 'Ia outou omai ia te a'u' o lona uiga o lo'o fetalai Iesu i se feso'ota'iga vavalalata o le tagata Kerisiano ma Ia. O lo'o fetalai Iesu i le omai e mafuta ma feso'ota'i ma Ia i taimi o lo'o feagai ai le tagata ma lu'itau o le olaga.

Lua, o lo'o fetalai ai Iesu, 'Outou uma o tigaina ma mafatia i avega'. O lona uiga, o lo'o silafia lelei e Iesu mea o lo'o mamafatu i o tatou olaga. O tigaina mai ma'i o le tino, ma'i o le mafaufau, ma'i o le loto ma agaga; o tigaina ona o feso'ota'iga ma mafutaga ua malepelepe, o mamafa ona o le le tagolima ma le ola tau fa'asoasoa; tigaina ona o le ola fa'apologaina e le agasala; ma le tele lava o le mau avega mamafa o lo'o tauave, ma e leai lava ma se isi e sao mai ai. O lona uiga la, ua talafeagai lelei le valaau a Iesu, ina ia tatou o atu ia te Ia.

Ma le lona tolu, fai mai Iesu, 'O a'u e malolo ai outou'. E leai lava se tagata e fia tauave pea ni avega mamafa i lona olaga atoa. O le uiga o le fetalaiga a Iesu, o ia e maua ai lo tatou malologa. E maua ia Iesu le tatou mapusaga. E maua foi ia Iesu lo tatou sa'olotoga.

O lo'o fa'amatala e Iesu le auala tatou te maua ai le sa'olotoga, le mapusaga, ma le malologa mai o tatou tigaina ma mea mamafa o lo'o tatou tauaveina i o tatou olaga.

Fai mai Iesu “Ia outou amoina la'u amo; ma ia outou fa'aa'oa'o mai ia te a'u.” O le upu lea o lo'o fa'asamoaina 'amo' o le fa'aliliuina mai lea o le upu peretania o le “yoke”. O le yoke la, o le amo e fa'alava i ua o povi e lua, e tausoa ai le tosoina o le suotosina e fa'amal'u ai le palapala mo le totoina o fa'atoaga. E ui lava ina mamafa le tosoina o le suotosina, ae a tausoa fa'atasi e povi e lua le galuega, ona fa'atoa mafai lea ona fai. O le ata lea o lo'o aumai e Iesu ina ua ia fa'aogaina le fa'aupuga lea, “Ia outou

amoina la'u amo”.

O le uiga lea o le fetalaiga a Iesu o lo'o ia fa'aogaina ai le upu amo. A tatou amoina a tatou avega e tumau pea le mamafa. Ae a tatou amoina le amo a Iesu tatou te tauamoina fa'atasi ma Iesu ona mama ai lea, au'a ua tu'uina mai e Iesu lona ua e amo ai le mamafa o lo'o tatou tauaveina.

O le fa'aogaina o le amo i le tua o le povi, e o fa'atasi le povi ua masani i le tosoina o le suotosina ma le povi fou fa'atoa fa'ata'ita'i. O le povi fou la, e a'oa'oina ina ua fa'amasani i le povi tuai au'a ua masani i le amoina o avega mamafa. E tele foi ina tauamo uma e le povi tuai le mamafa au'a o lo'o tau fa'amasani le povi fou. A'o le ata tonu lava lea o lo'o fa'aoga e Iesu i lana fetalaiga lea “Ia outou fa'aa'oa'o mai ia te a'u, au'a o a'u le agamalu ma le loto maulalo”. A tatou fa'aa'oa'o ia Iesu, ma tatou mulimuli ia Iesu, ma avea i tatou ma so'o moni o Iesu, ona tatou maua lea o le malologa o tatou agaga.

Tamaiti, o le faigofie ona avea o tatou ma so'o moni o Iesu, pe a tatou fa'aa'oa'o ia te Ia e ala i le fa'atinoina o tatou tiute i le agamal'u ma le loto maulalo. E tele fa'afitauli e feagai pea ma tatou, ae a tatou tumau pea ma fa'aa'oa'o i uiga fa'a-Iesu, ona leai lava lea o se mea tatou te popole vale ai. Ia tu'u atu uma ia Iesu mea o lo'o tatou mafatia ma saisaitia ai, au'a o Ia e maua ai lo tatou sa'olotoga ma lo tatou mapusaga.

GALUEGA FA'ATINO: Taliga fesili

1. O le a le uiga o le upu 'suotosina' e pei ona ta,ua i le tusi faitau?

Tali: O le meafaigaluega e fa'aoga e fa'amal'u ai le palapala.

2. A'o le a se fa'amatalaina o le 'amo' o lo'o ta'ua i le fetalaiga a Iesu?

Tali: O le laua e fa'alava i luga o tua o ni povi se lua o lo'o tosoina le suotosina.

3. O a ni uiga manaia o Iesu o lo'o ta'ua e tataua ona maua ma fa'aa'oa'o iai tatou?

Tali: O le Agamal'u ma le Loto maulalo.

4. O a ni a'oa'oga taua ua e maua mai i le tatou mataupu? (tu'u le avanoa e tali mai ai le vasega)

A'OA'OGA:

1. O Iesu le tali o tatou mafatiaga ma fa'afitauli uma.
2. Ia tatou fa'aa'oa'o i uiga fa'a-Iesu e manuia ai o tatou olaga.
3. Ia avea i tatou ma so'o moni o Iesu.

PESE: Lafo avega, ia Iesu, e alofa ia te oe
Lafo avega, ia Iesu, e alofa ia te a'u.
Luga luga, luga luga luga,
Luga luga, si'itia Iesu i luga.
Lalo lalo, lalo lalo lalo,
Lalo lalo, soli satani i lalo.

Fa'afetai atu mo le galue o lenei taeao, ia saunia e lau susuga le Faiaoga se tatalo e fa'ai'u ai le vasega.

IA MANUIA LE ASO SA!!

ASO SA – FEPUARI 11, 2024

MATAUPU: “O LE ATUA O LE ALOFA” (God is love)

TUSI FAITAU: Kenese 2: 1-17

SINI: Ia a'oa'o fanau ina ia iloa ma malamalama atili i le Atua o le alofa lava ia.

FESOASOANI MO FAIAOGA:

Taeao afua ailao ua maua i le alofa ma le agalelei o le Atua i lo outou soifua ma lo tatou ola ua tatou maua ai lenei aso fou. Malo le onosa'i fa'afetai le pale i feau ma galuega sa feagai ai o le vaiaso,

talitonu lava o lo'o sologa lelei mea uma aemaise o la outou foi pitolaau tauave i totonu o Ekalesia ta'itasi. O la tatou mau tauave lava, ia lava le taimi e mafuta ai ma le tusi faitau, ona mafai lea ona 'anoa lau fa'asoa i le mataupu a le fanau ua tu'uina atu. Ia manuia le tapenaga.

SINA FA'ASOA MO LE MATAUPU:

Ua manino tala o le foafoaga e pei ona fa'amatalaina e le tusi o Kenese, a'o tala o le amataga o mea uma na faia e le Atua alofa i lona mata'isau. I le mataupu leni e lua o le tusi o Kenese, o lo'o manino mai ai e fa'apea, a o leai lava ni vao iti o le fanua i le laueleele, ma ua le tutupu foi laau afu uma o le fanua, e leai foi se tagata e galue i le laueleele. Mulimuli ane, o mea uma ia na faia uma e le Atua ina ia ola ai le lalolagi uma, na o'o lava i le tagata na te galuea'iina le laueleele.

Ina ua uma ona faia e le Atua o le tagata, ona faia lea o le fa'atoaga ma ia tu'u i ai le tagata na te vaaia, na ave ai foi ma le fa'atonuga ina ia filifili ai le tagata i le lelei ma le leaga. O le Atua o le alofa, ua uma ona ia saunia mea uma i le fogaeleele, ua i ai foi le vaitafe e fa'as'us'u ai le laueleele ina ia ola ma matagofie laau uma i le vaai. O le tala i le faia e le Atua o le lagi ma le lalolagi, o mea sa le i ai ae ua i ai, o mea foi sa le mafai ona tutupu i le elelele ae ua tupu ma ola. O le ata lea o le Atua alofa sa i ai i le amataga, o le Atua foafoa, o le Atua na amata mea i le ola, o le Atua na ia fa'ama'ite mea lelei ina ia ola manuia le tagata na ia faia.

O le fa'atoaga foi i Etena e tusa ma le tala a Kenese, fai mai sa tafe atu ai le vaitafe e fa'as'us'u ai le fa'atoaga, ae ua ala ese'ese atu, ona avea ai lea ma vaitafe e fa. Ma o igoa o ia vaitafe, o Pisona, Kaiona, Hitekeliu ma Eufirate. O le vai o le fa'ailoga o le ola, a leai se vai ua leai se ola, o lona uiga o le manatu, o nei vaitafe po'o vai o lo'o tafe pea e o'o mai i le taimi nei ma o lo'o fa'as'us'u ai pea le laueleele ina ia tumau ma fa'aauau le ola. 'A o uiga ia o le Atua alofa, o ia na faia ma foafoaina mea uma o le foafoaga, o ia foi na te fa'aogaina le tagata na te galuea'iina ina ia manuia le lalolagi.

Tamaiti, afai o le Atua na ia faia le lagi ma le lalolagi ma mea uma o lo'o i ai, o lona uiga, na faia ma lona manatu alofa i le tagata, e i ai le fa'amoemoe tupito o lo'o taoto i le lumana'i. E ao foi la i le tagata ona mafaufau mamafa i le Atua alofa e tusa ma lona alofa tele mai i a'i tatou o lana fanau. Ia tatou iloa ona fa'afo'i le fa'afetai i le Atua ma lona agalelei mai i mea uma ua tatou maua.

GALUEGA FA'ATINO: Fa'amatala uiga o vaitafe e pei ona ta'ua

1. Pisona -
2. Kaiona -
3. Hitekeliu -
4. Eufirate -

A'OA'OGA:

1. Aua ne'i galo ona e fa'afetai i le Atua o lo'o alofa mai pea mo tatou.
2. Ia tatou filifili fa'atasi ma le Atua e sa'o ai a tatou fa'ai'uga fai.
3. Ia tatou fa'alogu ma usita'i i le Atua.

PESE: Le alofa o le Atua, pei o se li'o tele
E ta'amilo lava, leai sona muta'aga
Le alofa o le Atua, e fai pea e le gata
E alofa mai o ia, i aso uma lava.

Ia saunia e le faiaoga se tatalo e fa'ai'u ai le vasega.

IA MANUIA LE ASO SA!!

ASO SA – FEPUARI 18, 2024

MATAUPU: “O TAGATA I SE NOFOAGA” (A people in a place (1))

TUSI FAITAU: Kenese 11:27-32

SINI: Ia mae'a le mataupu ua malamalama le fanau po'o ai tagata o lo'o ta'ua a'o fea foi le nofoaga e pei ona ta'ua i le tala.

FESOASOANI MO FAIAOGA:

Ua fa'amalo le galulue fa'afetai fai o le faiva, talitonu lava i le alofa o le Atua o lo'o manuia mea uma e ala i le mafuta mai o lona mana e tauto'alua i lo tatou vaivai. E i ai foi le lagona, o lo'o mau pea le to'ovae o le fa'atuatua ae a le fa'atinoina o tiute ma faiva o lo'o feagai ma outou. Ia tumau pea i le Atua le vi'iga e o'o i le fa'avavau. Ae o le fa'amanatu lava ina ia gasolo lelei pea la tatou galuega e ala i le a'oa'oina o fanau a le Ekalesia. O le tusi faitau lava le atoaga o le mataupu, o lona uiga, ia matu'a lava lou taimi e te faitau ai ma su'esu'e ona 'anoa lea ma malamalama i le tala o le a fa'amatalaina. Ia manuia le tapenaga.

FESOASOANI MO LE MATAUPU:

O le tatou mataupu i lenei taeao 'O tagata i se nofoaga'. Ua tatou i ai nei i se lalolagi ua tumu i tagata, e o'o lava foi i lo tatou atunu'u o Samoa ua matu'a to'atele o le faitau aofa'i o tagata. E ao ai lava ona tatou fa'afetaia le Atua foafoa, ona o lo'o tupu pea ma olaola le lalolagi o tagata.

I le tatou tusi faitau o lenei aso, o lo'o aumai ai le tala o le tupu'aga po'o le gafa na tupuga mai ai le fa'apotopotoga o tagata o le lalolagi e pei ona finagalo i ai le Atua. O le tala i le gafa o Tara, o lana fanau o Aperamo, Nakori ma Arana. O tagata ia e pei ona ta'ua i le vaega lea o le tusi, o le fa'apotopotoga o tagata po'o le li'o fa'al'eiga. O le aiga o Tara ma lana fanau, o lo'o ta'ua i le li'o lea Aperamo ma Sarai fa'apea ma Lota. O Aperamo lea na suia lona igoa ia Aperaamo, ma Sarai na suia lona igoa ia Sara ina ua valaauina i la'ua e le Atua. O lona uiga, o le aiga lenei, e mafai ona tatou fa'apea, o le nofoaga o tagata o lo'o taoto ai le finagalo alualu mamao o le Atua. Leaga o tagata ia na tauto ai le Atua e tupuga mai ia te outou tagata e to'atele o le lalolagi e pei o oneone o le sami ma fetu o le lagi.

O le gafa o Tara na tupuga mai ai Aperamo ma Lota, o tagata na fa'aogaina e le Atua e auala mai ai lona finagalo ina ia fai ma tupuga o le lalolagi. E taua la tagata nei e pei ona aumai e le tusi o Kenese, aemaise a tala le gafa o le lalolagi, o tagata tonu lava nei na o latou amata mea i lo tatou tala fa'asolopito. A tatou faitau i le mataupu atoa lenei, o tagata lava ia na o latou faia le olo i Papelu ma auala mai ai le fa'aeseeseina o gagana a le lalolagi. O le tagata ma lona tupu'aga o le tagata foi ma lona fa'asinomaga. O tala o le gafa na tupuga mai ai tagata i le amataga mai o le lalolagi, ma o lo'o fa'ai'u mai ai tala o le foafoaga paia a le Atua e pei ona aumai e le tusi o Kenese.

Tamaiti, e taua lo tatou iloa ma malamalama i o tatou tupuga, aemaise o tagata na amata ona tupuga mai ai le lalolagi. Ae le gata i lea, o le fa'aogaina e le Atua o tatou tagata na ia faia i lona fa'atusa paia, ina ia foliga ia te ia. O tagata i se nofoaga, o lou Tama ma lou Tina, o lou uso, lou tuafafine ma lou tuagane, o lou aiga. A lelei ona amata lou aiga, e le taumate foi o le a lelei le gasologa o lou olaga.

GALUEGA FA'ATINO:

1. O ai igoa o le fanau a Tara?

Tali: O Aperamo, Nakori ma Arana.

2. A o ai igoa o to'alua o Aperamo ma Nakori?

Tali: O le to'alua o Aperamo o Sarai, a'o le to'alua o Nakori o Meleka.

3. E fia tausaga o Tara ae maua lana fanau?

Tali: E fitugafulu (70)

4. O ai le igoa o le Tama o Lota?

Tali: O Arana

5. O le a se taua o le tala sa fa'amatalaina? (tu'u le avanoa e tali mai ai le vasega)

A'OA'OGA:

1. E taua le malamalama i le gafa na tupuga mai ai le lalolagi.

2. Taua o le aiga, e amata ai lou ola a'oa'oina.

3. Ia fa'aogaina o tatou tagata e auala mai ai le finagalo o le Atua.

Fa'afetai tele mo le galuega o lenei Aso Sa, ia saili se pese e fetai ma le mataupu, ma 'ia tofi e le faiaoga se tama'ita'i e fa'ai'u le vasega i le tatalo.

IA MANUIA TELE LE ASO SA!!

ASO SA – FEPUARI 25, 2024

MATAUPU: “SUEGA MUAMUA”

TUSI FAITAU: Mataio 11:25-30, Kenese 2:1-17, Kenese 11:27-32

SINI: Ina ia su'esu'eina pea mafaufau o le fanau ma ia teu mau pea ma manatua tala mai le Tusi Paia e pei ona fa'amatalaina.

Taliga fesili ma fa'auma fuaiupu mai le Tusi Paia

1. Ia outou omai ia te a'u, _____, _____, _____.

Tali: o outou uma o e tigaina ma mafatia I avega, o a'u foi e malolo ai outou.

2. _____, _____, _____, ona maua lea e outou o le malologa mo outou agaga.

Tali: Ia outou amoina la'u amo, ma ia outou fa'aa'oa'o ia te a'u, au'a o a'u le agamalu ma le loto maulalo.

3. Ou te fa'afetai ia te oe, lo'u Tama e, le Alii o le lagi ma le lalolagi,

_____, _____.

Tali: ina ua e nan'a ia mea i e popoto ma e atamamai, a ua fa'aalia atu ia mea i tama valevale.

4. _____, o la'u avega foi e mama ia.

Tali: Au'a e ave gofie la'u amo

5. Ua tu'uina mai mea uma ia te a'u e lo'u Tama, e leai foi se tasi ua iloa le Atalii, ua na o le Tama,

_____, _____, _____.

Tali: ua leai foi se tasi ua iloa le Tama, ua na o le Atalii, ma se ua loto le Atalii e faaali i ai.

6. E fia vaitafe sa ta'ua i le tala, a'o a foi igoa o ia vaitafe?

Tali: E fa, o Pisona, Kaiona, Hitekeliu ma Eufirate.

7. E fa'aapefa ona tatou iloa o le Atua alofa e tusa o le tala a Kenese?

Tali: Na manava e le Atua le manava ola i ona poga'iisu ona ola ai lea o le tagata, na ia faia foi le fa'ato'aga ma fa'atutupu laau uma.

8. O ai igoa o le fanau a Tara?

Tali: O Aperamo, Nakori ma Arana.

9. O tagata ia na ta'ua po'o le aiga foi i le tala a le Kenese, o ai ia tagata?
Tali: O tagata e au i ai le gafa o tagata uma po'o le lalolagi atoa.

10. O a ni a'oa'o manaia sa e maua mai i mataupu o lenei Masina? (tu'u le avanoa e tali mai ai le vasega)

PESE: Faitau le Tusi Paia
Ma tatalo i aso uma
Tatalo i aso uma, tatalo i aso uma.
Ona e tuputupu ai lea x2

Fa'afetai atu mo le galuega sa fitaituga ai, ia fa'amanuia tele le Atua, tofi ane se alii e fai se tatalo ma fa'auma ai le vasega.

IA MANUIA LE ASO SA!!

ASO SA – MATI 03, 2024

MATAUPU: “FEAGAI MA TAGATA TETE'E” (Opposition surfaces)

TUSI FAITAU: Neemia 4: 1-18

SINI: Ia malamalama tamaiti so'o se mea lava tatou te faia pe lelei pe leaga foi e i ai lava le 'au tete'e e pei o tagata o lo'o ta'ua i le tala.

FESOASOANI MO FAIAOGA:

Malo lava le onosa'i fa'afetai foi le tapena mo mataupu a le fanau i Aso Sa ta'itasi. O le tatou Sa lava e fau tele, o le tele foi o sulu e maua ai figota lelei au'a le tatou galuega. Ae o le tagi lava a le pu mate, ina ia fa'aosofia pea moegaluaga e ala i le faia o lau sa'iliga ma le fa'amaoni i le tusi faitau ua tu'uina atu. O le auga o aute, ia faigofie ma 'anoa la outou fa'asoa mo le vasega au'a le feau momoli o lo'o aumai e le tusi faitau. Ia 'oa pea lau tapenaga mo le mataupu.

SINA FA'ASOA MO LE MATAUPU:

O le tusi o Ne'emias ma le tusi o Esera, o tusi ia o le Feagaiga Tuai na tusia i le vaitau o le pulega a le malo Peresia, le malo na ta'uta'ua i le lalolagi o le Feagaiga Tuai ina ua latou fa'ato'ilalo pulega a le malo Papelonias. O le malo o Papelonias, o le malo lea sa latou fa'ato'ilaloina le malo o Iuta ma fa'atamai'a Ierusalem, ma ave fa'atagataoutauaina tagata o sa Iuta i Papelonias. E o'o ane la i le vaitau o le pulega a Peresia, o lo'o nonofo pea tagata o sa Iuta i totonu o atunu'u sa i lalo o le pulega a Papelonias.

O Ne'emias e le se tagata fa'atupu vevesi. O le tagata e iloa fuafua lelei ma tapena lelei auala e fa'afoe ai la'asaga o mea na te faia ina ia taunu'u mea uma i se taunu'uga lelei. E fa'aaloalo lana tautala, e atamai upu na te fa'aogaina, e iloa foi fai feutaga'iga lelei ina ia fo'ia ni fa'afitauli ogaoga e tutupu mai. E i ai tagata o auala latou te fa'afoeina ai se mea tau le va feso'ota'i ma isi tagata, e le gata e leaga upu latou te fa'aogaina e feso'ota'i ai, ae fa'amauualuluga lagona e feso'ota'i ai ma isi tagata. E o'o lava i totonu o aiga i le va o matua ma fanau, o le va o ulugali'i, o le va o tagata faigaluega ma i latou e ona galuega, e fa'apena foi i totonu o fa'alapotopotoga po'o Ekalesia, a le tausia lelei lou va ma le isi tagata, aemaise tagata o lo'o outou pale feagai i ni mafutaga, ni galuega po'o ni auaunaga. O le mea ma'utinoa lava, e tel'e le avanoa e alia'e ai le vevesi, le feaina'i, le fet'ot'oa'i, aemaise o ni taua ma ni fevaevaea'iga.

A o Ne'emias, e atamai e fai feso'ota'iga e l'e tupu ai ni vevesi. Na te iloa fa'ato'ato'a mea vaivai ma uiga fa'atupu vevesi o tagata. E to'afilemu lana fa'asoa i ni vevesi e tupu mai. E o'o lava i le faitio mai o Sanepalata, o Tovia ma Gesemu, na atamai lava Ne'emias e fai le tali e pei ona ta'ua. E pei o lo'o tali atu Ne'emias, O le Atua o le lagi e ona le galuega, a o matou na o ni auauna ua tofia e le Atua. A outou

taofia la le galuega, ua outou finau ma le Atua. O lo matou tofi lenei mai le Atua.

E le'i fa'atau matatao pe fia si'i taua Ne'emias i le tau fa'aleaga mai o tagata i le galuega o lo'o fai. E foliga mai e lelei le ituaiga auala lea na fa'aoga e Ne'emias e fa'atautai ai fa'afitauli sa fetoi'ai ma ia i lona naunau e ta'ita'i lona nu'u se'i toe atia'e pa o Ierusalem. O le tagata atamai ma to'afilemu lona loto e fai ai se mea lelei, o le tagata lea e mafai ona fetoi'ai ma fa'afitauli ma fa'aosoosoga ma manumalo ai. A o le tagata e fai le fa'amauualuga ma so'ons mateletele, e alia'e vevesi ma maua avanoa o le leaga e manumalo ai.

E tele lava auala o lo'o fa'aoga e tagata e fa'atautai ai le lelei ma le leaga. Ae a fa'atautai fa'atasi ma le Atua, e maua auala mai le Atua e fa'ato'ilalo ai mea leaga ae fa'atupu mea lelei ma mea tusa'afia i o tatou olaga.

Po'o le a lava le ogaoga ma le matuitui o fa'aosoosoga ma puapuaga sa feagai ma Iesu, sa tumau pea lona onosa'i ma lona fa'apalepale, sa tumau foi lona lotomaulalo ma lona fa'amoemoe i le fa'atasi mai o lona Tama i le galuega fa'aola ua valaauina ai o Ia.

GALUEGA FA'ATINO: Taliga fesili

1. O ai tagata ia na fa'alavelave pe na tete'e i le galuega a Ne'emias?

Tali: O Sanepalata, o Tovia, o Gesemu ma tagata Arapi.

2. O le a le ituaiga tagata e fa'amatalaina ai Ne'emias?

Tali: O se tagata onosa'i, fa'apalepale, e le fa'atupu vevesi a'o se tagata foi e tumau i le Atua e tusa ma lona valaauina.

3. A o a ni auala na fa'aogaina e Ne'emias na mafua ai ona fa'aauau pea le galuega?

Tali: E le'i fiugofie ae na finau pea ma naunau lona loto e fai le galuega o lo'o soifua lona Atua.

4. O a ni a'oa'oga ua e maua mai i le tala sa fa'amatalaina? (tu'u le avanoa e tali mai ai le vasega)

A'OA'OGA:

1. Ia mautinoa e tautai le Atua i mea uma tatou te faia.

2. Ia tumau i le Atua e le fiu gofie pe fa'avaivai ai.

3. Aua le amana'ia tagata tete'e ma faifai mai.

PESE: A ia e tau malos, tete'e i le fili

Aua lava ne'i e fa'avaivai.

A ia e tau ma le Alii o 'au

E aoga e tutumau.

TATALO: Iesu la matou uo, fa'afetai i lou fa'atasi mai a o matou fa'alologologo i tala o le ola i lenei taeao e auala mai i le Tusi Paia. A'oa'o mai pea ina ia matou tumau ma savavali i ala o lau Afio e manuia ai o matou olaga. Fa'amagalo i matou i lo matou le usiusita'i ma le le fa'alogo i o matou matua ma e matutua. Ona o lou suafa Iesu la matou uo sili...AMENE.

IA MANUIA LE ASO SA!!

ASO SA – MATI 10, 2024

MATAUPU: “USITA'I E OLA AI” (Obey to live)

TUSI FAITAU: Jeremiah 21:8-10

SINI: Ia malamalama tamaiti, o le usita'i i le finagalo o le Atua, tatou te maua ai le ola.

FESOASOANI MO FAIAOGA:

Fa'atalofa atu foi i lenei aso fou ua tatou maua, taofi lava sa faitau lau Tusi Paia ma e su'esu'e e tusa ma le mataupu o lenei Aso Sa. O le agaga lava ia, e ao ona fa'ataua ma fa'aavanoa lou taimi mo lea foi vaega o lou soifua ofoina mo le galuega a le Atua. Ia manuia le tapenaga o lenei Aso Sa.

SINA FESOASOANI MO LE MATAUPU:

O le tala sa tatou faitauina mai le tusi a le perofeta o Ieremia, o lo'o fa'aailoa mai ai le taumafai atu o le perofeta e fa'aailoa le finagalo o le Atua i le nu'u o Iuta. A o le mea ua tupu, ua fiu a Ieremia e fa'aailoa atu le finagalo o le Atua i le nu'u, ae ua fa'amaa'aina pea o latou loto. Ua malosi le fiafia i le ifo i tupua ma le ola agasala. E amata mai lava i le tupu le l'e gaua'i ma le le usita'ia o le finagalo o le Atua. O le ala foi lea o le to'asa ai o le Atua ma ia fa'atagaina ai le malo Papelonia latou te vagaia, sasa ma ave fa'apagota i latou i Papelonia.

Ua fa'aailoa manino i ai e Ieremia le finagalo o le Atua mo sa Iuta. A fia mau e i latou le ola, ona aga'i lea e o i le tafeaga i Papelonia, au'a afai ae le usita'i, e mautinoa lava e fano uma lava i latou, au'a o lea ua to'asa le Alii ona o o latou uiga ma amio ua le tusa ai ma lona finagalo. Afai foi e i ai nisi e tete'e pea, e mautinoa a e fano lava i le pelu atoa ai ma fa'ama'i ma le oge, ona o le malosi o le ola agasala ma le ifo i tupua o ona tagata. Ua latou le manatu i tulafono aemaise o le ulua'i tulafono na a'oa'oina ai i latou e augatama o le nu'u, "Aua ne'i fai mo oe ni atua ese i ou luma". (Esoto 20:3)

Tamaiti, e le'o se mea lelei le l'e usita'i i le finagalo o le Atua, au'a e o'o mai ai puapuaga ma faigata i a'i tatou. Peita'i, o le taua o le usita'i i le finagalo o le Atua, e le gata tatou te maua ai le ola ma fa'asaoina ai i tatou mai faigata, ae tatou te mauaina ai foi fa'amanuiaga e tele. E leai a se isi auala tatou te mauaina ai le ola, ua na o le usita'i lava i o tatou ta'ita'i ma faia le finagalo o le Atua ona tatou maua lea o fa'amanuiaga ese'ese e le gata i le tino, mafaufau, ae silisili ai fa'amanuiaga i la le Agaga.

O le galuega foi lea a le faifeau fa'apea matua ma faiaoga Aso Sa o lo'o fai, e pei foi ona faia e le perofeta o Ieremia, o le fa'aailoa atu lea o le finagalo o le Atua, ina ia aua ne'i o tatou faia le agasala, au'a e o'o mai ai puapuaga i a'i tatou. Ae ia tatou usita'i i le finagalo o le Atua fa'apei ona usita'i Iesu i le finagalo o lona Tama.

GALUEGA FA'ATINO: Fa'atumu avanoa i upu ua tu'uina atu i lalo.

fa'ama'i, afi, vete, manuia, susunuina, vagaia, outou, tupu, vavae, fetalai, oti, fa'asaga, leaga, pelu, ola, oge.

Fa'auta ou te tu'uina i o _____ luma le ala o le _____ ma le ala o le _____. O l'e nofo i lenei aai e oti o ia i le _____, ma le, _____ ma le _____; a'o le alu atu ma _____ atu i tagata o Kaletaia o e _____ outou, e ola o ia, e ave fa'amanuiaga ma ana _____. Aua ou te _____ atu i lenei aai ia _____ ai, ae le ina ia _____ ai, o lo'o _____ mai ai le Alii; e tu'uina atu ai i le lima o le _____ o Papelonia, e _____ foi e ia i le _____.

A'OA'OGA:

1. O Iesu o le ala, upu moni, ma le ola.
2. Usita'i i fa'atonuga a matua ma o tatou ta'ita'i.
3. Ia taumamao ma le ifo i tupua.

PESE: Fa'alogoma usita'i, e leai se isi ala
E fiafia ai Iesu pe a fa'alogoma usita'i.
Galue ma fa'amaoni, fiafia ma olioli

E maua ai le tau'i e aumai e Iesu.
Fa'alogo ma usita'i, e leai se isi ala
E fiafia ai Iesu pe a fa'alogo ma usita'i.

Fa'amalo atu lava mo le galuega o lenei Aso Sa, ia fa'amanuia le Atua e tusa ma lo outou tautiga. Ia tofi e le faiaoga se tama'ita'i e fai le tatalo e fa'ai'u ai le vasega.

IA MANUIA TELE LE ASO SA!!

ASO SA – MATI 17, 2024

MATAUPU: “NA IA AUINA ATU TA'ILUA I LATOU” (He sent them two by two)

TUSI FAITAU: Mareko 6: 7-13

SINI: Ia malamalama le vasega, po'o ai na auina atu, ae po'o le a foi le mea na auina atu ai nei tagata latou te o e fai.

FESOASOANI MO FAIAOGA:

Fa'afetai i le Atua ua tatou maua lenei aso fou i lona alofa tausii i lo outou soifua ma lo tatou ola. Fa'amalo lava le folau, malo le onosa'i ma le fa'apalepale i le fa'atino o a outou matafaioi tauave i so'o se tofiga ua valaauina i ai outou e le Atua. O le fa'amanatu lava ina ia tautuana lau tapenaga o le vaiaso, ia fa'avagavaga pea lou taimi mo le tatou tusi faitau ua tu'uina atu o le mataupu. Ia manuia le galuega.

SINA FESOASOANI MO LE MATAUPU:

O le vaega lenei o le tatou tusi faitau e pei ona aumai ai le tatou mataupu, o le auina atu e Iesu o ona so'o mo le galuega e pei ona fa'amatalaina e Mareko. O le valaauina e Iesu o ona so'o mo le galuega, e le itiiti le taimi na tapena ai. Lea la ua o'o i le taimi e auina atu ai e fa'atino o latou tiute fa'a-so'o, o a uma a'oa'oga na faia e Iesu a'o latou mafuta i lana galuega fa'aola, o mea uma na ua mafatotoga ai le 'au so'o. O le tapenaina e Iesu o ona so'o, na ia fetalai i ai, aua latou te ave se mea i a latou malaga, tau lava o le to'oto'o e tasi.

E le fa'apea ua tu'u lafoa'i e Iesu ona so'o e o, leai, silafia lelei e Iesu le mea e ave i ai le fa'amamamua a le tagata pei foi o tatou. Au'a o isi ia mea e fai ma fa'alavelave i le tapenaga a le tagata e fia avea ma so'o moni o Iesu. Manino le tala a Mareko, ua ia tu'u atu foi le pule i agaga leaga, o le tu'uina atu o le pule, o le tu'uina atu foi lea o le mana e mafai ai ona latou tulia temoni, fa'amalolo ma'i, ma fa'amanuia i tagata e alolofa ifo i a'i latou i le galuega tala'i o le Talalelei. O lona uiga, o le mea taua i le finagalo o Iesu, ia ofo atoa le loto o le tagata e fai ai le galuega ma le fa'amaoni. Ia aua ma le masalosalo, aua ma le popole, aua le pala'ai a 'ia toa le loto ma mau le fa'atuatua i l'e e ona le valaau.

Tamaiti, e le 'ese le auina atu o so'o o Iesu ma tatou, e tofi lava le tagata ma lona valaauina mai le Atua, ma e ese'ese uma lava o tatou valaauina. A o lea ua fa'amanatu mai mo tatou i lenei aso, po'o a lava tofiga ma galuega po'o matafaioi foi e tofifi i ai tatou e galulue ai, ia tatou tula'i ma o e fa'atino. E tele mea e fai ma fa'alavelave i lo tatou ola e avea ma so'o, a o lea ua toe fa'amanatu mai e Iesu, aua tatou te popole i se mea e tasi, pau lava le mea ia maua agaga ua salamo ma foi i le Atua e manuia ai. O le galuega na feagai ma Iesu, o le galuega fa'aola mo tagata mafatia o lo'o fia maua le fesoasoani. E fa'apena foi tatou, ua i ai foi le malosi i a'i tatou e mafaia ai so'o se mea, pe a tatou fa'alagolago i lona mana e fa'atino ai o tatou tiute ma le fa'amaoni.

GALUEGA FA'ATINO: Fesili fa'atupu manatu

1. Aisea na fetalai ai Iesu i ona so'o 'aua latou te ave se mea i a latou malaga?

Tali: Silafia e Iesu e alolofa ifo tagata i a'i latou e tusa ma la latou galuega.

2. O le a le fetalaiga a Iesu i ona so'o pe a i ai se le talia latou ma le fa'aloge ia latou?

Tali: A outou o ese i lea mea, i le tou tutu atu ai le eleele nai o outou vae, e fai ma molimau ia te i latou.

3. Aisea na mafai ai e le 'au so'o ona tulia temoni ma fa'amaloloina tagata?

Tali: Ona ua tu'uina i ai e Iesu le pule i agaga leaga.

4. O le a se a'oa'oga ua tou maua mai i lea tala sa fa'amatalaina? (tu'u le avanoa e tali mai ai le vasega)

A'OA'OGA:

1. Aua tatou te popole i se mea e tasi au'a e saunia e le Atua mea uma.

2. Ia tatou talitonu ma fa'atuatua, o le mana o Iesu tatou te mafaia ai so'o se mea faigata.

3. Tula'i ma alu e tali le valaau ua valaauina ai oe e le Atua.

Fa'afetai lava mo le galuega sa fitaituga ai o lenei aso, ia fa'amanuia le Atua. Ia saili se pese mo le mataupu ma tofi se alii e fa'ai'u le vasega i le tatalo.

IA MANUIA LE ASO SA!!

ASO SA – MATI 24, 2024 (Aso Sa Laupama)

MATAUPU: “TAULE'ALE'A TALAVOU I KETESEMANE” (Young man ia Gethsemane)

TUSI FAITAU: Mareko 14: 43 - 52

SINI: Ia malamalama le vasega i le taule'ale'a talavou i Ketesemane, ia iloa lona igoa ma le pogai na mulimuli ai i le taimi na pu'e ai Iesu e tagata tau ma auauna a le ositaulaga.

FESOASOANI MO FAIAOGA:

Fa'atalofa atu foi i lenei aso fou ua tatou maua i le alofa tausii mai o le Atua i a'i tatou o lana fanau, malo lava le tauata'i i feau ma galuega o lo'o feagai ai ma outou. O le Aso Sa lenei o le malaga fa'atupu a Iesu ua masani ona tatou fa'amanatu i tausaga uma. E manaia foi ae fa'atino sina ata pu'upu'u e le vasega, e fa'atatau i le mataupu ua tu'uina atu.

SINA MANATU MO LE MATAUPU:

O le vaega o le tusi faitau ua fai ma tatou mataupu i lenei Aso Sa, o lo'o aofia ma le fuaiupu e 51, ma le 52, o lo'o ta'ua ai le taule'ale'a talavou i Ketesemane na mulimuli ia Iesu ina ua pu'ea o Ia e fitafita Roma, ma auauna a le ositaulaga sili. O le fa'amatalaga e uiga i le taule'ale'a lenei, ua na o le Evagelia lava a Mareko o lo'o ta'ua ai. E le o ia o se so'o o Iesu, po'o se auauna foi o le fale na fa'atino ai le taumafataga mulimuli a Iesu ma ona so'o. A o se taule'ale'a e mau i le fale e latalata i le togalaau oliva i Ketesemane. Ua fai mai nisi o le tamaitiiti lenei o le fale o lona Tina, lea na fai ai le taumafataga mulimuli. Ua oso lona fefe ma le atuatuvaile i luga o lona moega, ina ua o'o mai i lana fa'aloge le pisapisao ma le alaga leo tetele, a o latou toso fa'at'at'a le Alii o Iesu. Ua avea ai le nofoaga filemu o Ketesemane, ua fai ma fanua o le fia fa'ao'o o le oti ma le fia fa'aumatia o galuega alofa a Keriso. Ua mafua ai ona atuatuvaile lona loto i luga o lona moega, ma manatu ai ia se'i molimau i lenei pisapisao.

Ua fia fai lenei taule'ale'a ma tagata matamata a o i ai Iesu i le amataga o ona puapuaga. Ua na ona tula'i lava i luga tago i lona ie afu lino ua pulupulu, ma fa'anatinati atu loa i le mea o sau ai le vavao o leo o tagata, aunoa ma sona iloa ua lamatia ai ma lona ola. Ua taunu'u atu, ua iloa ai ua leai ma se so'o o Iesu o ia vaai atu i ai, au'a ua sosola mo lo latou saogalemu. Ua mulimuli mamao atu lenei taule'ale'a

talavou, a ua fa'ate'ia ina ua pu'ea fa'afuase'i o ia e fitafita tau, o lea na ia fa'amamulu ai lona ie lino na pulupulu ai, ma maua ai ma lona avanoa e alo 'ese ai, ma alu ai ma le saosaoa tele. Ua toe taoto i lona moega ua atili ai ona gatete i le fefe.

O le fa'aailoga lea o le mata'utia tele o le motu o tagata, ua t'ut'u fa'atasi, ia fa'aumatia Iesu. O le mafuaaga foi lea o le sosola fa'asulusulu o so'o o Iesu, mo lo latou saogalemu, aemaise ai le fa'afitia ai e Peteru o lona Alii, ina ua molimau atu nisi o le motu o tagata o ia o lona so'o. Peita'i, o le mafuaaga moni lava na maua ai le avanoa o so'o e sosola ai, ma lenei taule'ale'a talavou, ina ia taunu'u fetalaiiga a Iesu, Ioane 18:9; O i latou na e foa'i mai ia te a'u, e le'i fano so latou e to'atasi. E o'o ia i latou ua mulimuli ia Iesu ona o le fia malamalama, ae le o i ai le fa'atuatua.

Tamaiti, o le igoa o le taule'ale'a talavou, o Ioane Mareko, o ia foi lea e fa'apea o le tusitala o le Evagelia o Mareko. Na amata mai lava i le itupo na fa'alaina ai Iesu, na a'afia lona olaga i le soifua o Iesu ma naunau ai lava, e fai o ia ma lupe fa'alele e tala'i le Tala Lelei a Keriso ia so'o ai le lalolagi atoa. O lea lava ua o'o mai i o tatou taimi, o lo'o folafola mai pea e lenei tama talavou le tala o le alofa tunoa o le Atua, ua fa'aalia tino mai ia Iesu Keriso lo tatou Fa'aola.

GALUEGA FA'ATINO:

Fai mai le fuaiupu e 50 – 52; Ona tuua ai lea o ia e i latou uma, ua sosola. A ua mulimuli atu ia te ia le tasi taule'ale'a, ua pulupulu lona tino i le ie lino, ua latou pue atu foi ia te ia; a ua tuua e ia e ia le ie lino, ua sola ia te i latou ua le lavalav'a.

Tusi mai sau parakalafa e tasi, e fa'aailoa mai ai ou lagona, o se mea ala'ga tataua le sosola a le 'au so'o, ae tuua ai na o Iesu. O lea foi ua mulimuli pea le taule'ale'a talavou ae na i'u foi i le sola au sulusulu mo lona ola. Fa'amatala mai foi mafuaaga o ou lagona.

A'OA'OGA:

1. Ia a'oa'o'ina mai isi tagata.
2. E tauave ma malu puipuia e Iesu lo tatou ola.
3. Ia ave le ola mo Iesu.

PESE: Pese ma Viiga 126

Ia tofi ane se tama'itai e fai le tatalo e fa'auma ai le vasega, manuia fuafuaga o le vaiaso.

IA MANUIA TELE LE ASO SA!!

ASO SA – MATI 31, 2024

MATAUPU: “AUA TOU TE MATATA'U” (Do not be afraid) (ASO SA ESETA)

TUSI FAITAU: Mataio 28:1-10

SINI: Ia a'oa'o tamaiti ia latou iloa, o le avea'i mai le agelu, o upu o le mautinoa.

FESOASOANI MO FAIAOGA:

Fa'afeiloa'i atu foi i lenei Aso Sa o le toetu manumalo o lo tatou Alii o Iesu Keriso, ua tatou oaoa ai nei i faleseu ma sa'a i ma'a o malie, i lona alofa ma lona agalelei. Malo le soifua manuia ma le lagi matafi ia te outou uma, talitonu o lo'o tatou maua fa'atasi le ola ma le malosi fa'afouina mai le matai o le galuega. Ia manuia le As Sa o le Eseta.

FESOASOANI MO LE MATAUPU:

O le Aso Sa lenei o le Toetu, e pei ona tatou fa'amanatu i tausaga ta'itasi. O le Toetu mai le oti, e le o se mataupu faigofie, ona e o'o mai lava i le as'o, e i ai lava tagata latou te le taliaina, pe latou te le

talitonuina. Ao tatou, ua ta'ua o le 'au Kersiano, po'o e ua talia ma fa'atuatua i le vavega lenei o vavega na faia e le Atua, e ala i le fa'atuina mai o Iesu mai le oti ma le tu'ugamau.

O le aveai'i la mai le agelu i Tina, sa mua'i usu atu i le tu'ugamau, 'Aua lua te matata'u', o le upu lava foi lea a Iesu sa fetalai atu ai i Tina, i le nofoaga lava lea, i ni nai minute talu ona fai i ai le agelu. E leai se mea fou o tupu i lea taeao, au'a o mea uma lava e o'o i le maliu ma le Toetu mai o Iesu. Ua uma lava ona mua'i ta'u atu, a o le'i o'o mai i le fa'ataunu'uina o nei mea uma. Pau lava lea o le itu faigata, ona e tusa lava po'o so'o o Iesu, po o Tina foi e pele i a latou le Alii, o tagata lava o i ai le lagona le mautonu, aemaise itu aso fa'apea, ua o'o ai le Alii o Iesu i lona mamalu. Ae o le tuana'i po o le uma atu o ia upu o le mautinoa e pei ona fai ma tatou mataupu o lenei taeao, 'Aua tou te matata'u'. Na mulimuli mai ai loa ma le feau moni lava o le Eseta, "E le o i'inei o Ia, a ua Toetu mai o Ia, e pei ona mua'i fetalai atu." Ua muamua atu o Ia i Kalilaia. O la'ia ma ta'u atu le talalelei, ae 'aua lua te matata'u.

Ua Toetu Iesu mai le oti, e le o toe i ai i le tu'ugamau le nofoaga o le oti. Ae o lo ua muamua atu i o tatou luma, ma o la tatou galuega, o le o atu e tala'i le talalelei. Tamaiti, o lo'o fa'apea mai le agelu i a'i tatou, aua le popole ae fa'ato'ato'a lelei le mafaufau, fiafia ma fifilemu. O ia tulaga uma ma isi, e fa'alagolago lava ia tatou. O lea ua taunu'u. Ua Toetu Iesu, e manumalo e fa'avavau. O le taulaga lea o le alofa tunoa o le Atua mo le lalolagi. Ina ia le toe matata'u i le oti, au'a o lea ua manumaloina e le Alii i le aso nei.

GALUEGA FA'ATINO:

1. Fa'amatala fa'apu'upu'u mai i au lava upu, le uiga o le Toetu o le tagata fa'atasi ma Iesu.

Tali: O le tagata e oti o fa'atuatua fa'amaoni i le Alii, e oti a i le tino fa'alelalolagi, ae o le talitonuga, o ola fa'atasi ma le Alii Toetu i lona malo e fa'avavau.

2. O le tagata lea e toetu fa'atasi ma Iesu, o lona uiga e le oti, e ola pea lava?

Tali: E leai se tagata e fa'avavau, e oti lava tagata uma ae o le tagata o ta'ua i luga, e toetu fa'atasi ma Keriso.

A'OA'OGA:

1. Aua le fefe, ua Toetu Iesu.
2. Ia fai oe ma ave feau o le Toetu.
3. Taumafai ia lua toe t'ut'u fa'atasi ma Iesu.

PESE: #48 "Ina tatou fa'afetai , Aleluia"

IA MANUIA LE ASO SA!!

ASO SA – APERILA 07, 2024

MATAUPU: "LA'ASAGA I LE FA'ALELEIGA: TOE FA'ALELEIA" (Steps to reconciliation: restitution)

TUSI FAITAU: Luka 19: 1-10

SINI: Ia malamalama le vasega, i la'asaga uma na o'o i ai le olaga o le tagata e igoa ia Sakaio.

FESOASOANI MO FAIAOGA:

E viia pea le Atua i lana tausiga alofa ua tatou aulia mai ai foi lenei Masina, malo le folau fa'afetai le pale, fa'amalo le onosa'i i le fa'atinoina o lo outou valaauina mai le Atua. Manatu lava o lo'o sologa lelei mea uma e tusa o la tatou pitolaau tauave i totonu o Ekalesia ta'itasi. Fa'amoemoe lava sa matua lava lou atimi mo le tatou tusi faitau ua tu'uina atu mo le mataupu. Ia manuia le tapenaga.

FESOASOANI MO LE MATAUPU:

I le soifuaga ma le olaga o le tagata, e i ai ona la'asaga ua uma ona fa'ataoto mai e le Atua mai lava i le

amataga a'o le'i fanau mai i le lalolagi nei. O ia la'asaga uma o lo'o i ai fuafuaaga mamao a le Atua i le lumana'i e finagalo ina ia tumau ai le tagata e manuia ai. Peita'i, o le tagata lava ia e femoumoua'i i le tele o taimi, e le mafai ona tumau i se mea e tasi, o isi taimi ua lelei o isi foi taimi ua le lelei. Ae po o le a lava le ola femoumoua'i o le tagata, ae le mafai ona ave'esea ai le alofa o le Atua.

O le tatou mataupu o lenei taeao e tusa ai ma le tatou tusi sa faitauina, o le tala i le tagata e igoa ia Sakaio. Ua tatou iloa uma Sakaio a tamaiti, lelei tele, o Sakaio lea na a'e i le laau o le Sukamoru e va'ava'ai ia Iesu. O Sakaio o lana galuega sa galue ai i totonu o le malo Roma, o le alu lea e ao lafoga (tupe) a tagata, o ia tupe e tatau lava ona ao au'a o lafoga ia e tatau ona totogi e tagata mo le malo. O le mea ua tupu, ua le gata ina ao lafoga masani a tagata, ae ua i ai foi ma le tupe fa'aopoopo pe fa'asili e Sakaio mo ia. O le vaai la a tagata ia Sakaio, o ia o le tagata agasala au'a e leaga lana mea sa fai i tagata, ae ua le fa'amaoni foi i le fa'atinoina o lana galuega.

Fai mai ina ua o'o atu Iesu i Ieriko i lana galuega fa'aola, a'o lo'o i ai le tagata lenei o Sakaio, ua alu ifo e fia vaai ia Iesu. O le a'e o Sakaio i le laau, o le fa'aailoga lea o lo'o naunau i se isi la'asaga fou mo lona olaga, au'a a fua i le vaai a tagata ia Sakaio, o ia o le tagata agasala. Ae manatua e tatou, o le galuega o lo'o feagai ma Iesu i le taimi lea, o le galuega fa'aola mo tagata. A lea e atagia i le fetalaiga a Iesu na fai ia Sakaio, 'Sakaio e, ia e vave ifoifo ia i lalo, au'a e tatau ona ou nofo i lou fale i le as'o.'" E le'i toe fa'atali Sakaio, ae na vave ona talia le fetalaiga a Iesu ma fa'ataunu'u loa ma lona naunau atu ina ia i ai se isi la'asaga fou mo lona olaga.

Ioe tamaiti, ua a'oa'o mai le tala lenei i le valaauina o Sakaio e Iesu mo i tatou, e le gata ina saili mai Iesu i le tagata, ae tatau foi ona o tatou saili ia te Ia ma le fa'amaoni i taimi uma lava o le olaga. O le soifuaga lenei tatou te ola ai, so'o se la'asaga lava o lo tatou ola, e i ai lava faigata ma puapuaga e feagai ma i tatou. E leai foi se isi o tatou e selau pasene lona atoatoa, leai, e tofu lava le tagata ia ma lona sese, ae o le mea taua, ia tatou iloa ona fa'amaulalo ma saili i le Atua ma le loto salamo, au'a o lo'o saili mai foi o Ia mo i tatou ina ia tatou talitonu ma fa'atuatua ia te Ia.

GALUEGA FA'ATINO: Taliga fesili

1. O le a le fetalaiga a Iesu ina ua ia iloa atu Sakaio o i luga o le laau?

Tali: Sakaio e, ia e vave ifoifo ia i lalo, au'a e tatau ona ou nofo i lou fale i le as'o.

2. Ae o le a le muimui a i latou na iloa le mea na tupu?

Tali: Ua alu atu o ia i le tagata agasala e api ai.

3. O le a le tala a Sakaio na fai ia Iesu e uiga ia te ia lava?

Tali: Fa'auta, le Alii e, o le a ou vaeluaina atu a'u mea i e matitiva; afai foi ua ou ave a se tasi i se ala pepelo, ou te tau ai e ta'ifa.

4. Fa'amatala mai i au lava upu, po'o le a se a'oa'oga ua e maua mai i le tala ia Sakaio? (tu'u le avanoa e tali mai ai le vasega)

A'OA'OGA:

1. Saili ia Iesu mo se la'asaga fou o lou olaga.

2. O Iesu le tali o tatou mafatiaga uma.

3. Ia e fa'amaoni i le lua mafutaga ma Iesu.

PESE: Saili, ona e maua lea

Tu'itu'i, na te tatala mai

Fa'alogu, o lo'o valaau mai

Le alofa lea ua to'ulu mai.

Fa'afetai lava mo le galuega sa gapatia ai o lenei Aso Sa, o lo'o silafia e le Atua le tagata ma lana e fai,

o ia foi na te fa'amanuia mai e tusa o la outou galuega. Ia tofia e le faiaoga se tama e fai le tatalo e fa'ai'u ai le vasega.

IA MANUIA TELE LE ASO SA!!

ASO SA – APERILA 14, 2024

MATAUPU: “FAIGAUAO E FA'AVAE I LE ALOFA” (Friendship based on love)

TUSI FAITAU: 1Samuelu 19: 1-7

SINI: Ia malamalama le vasega, i le lelei o se faigauo e fa'avae i le alofa.

FESOASOANI MO FAIAOGA:

Malo lava le onosa'i e tusa o feau ma galuega sa feagai ai ma outou i le vaiaso, fa'afetai foi mo le fa'atinoina o lo outou valaauina e ala i faiaoga Aso Sa. Talitonu le manatu sa lava sou taimi na faitau ai le tatou tusi faitau mo le tatou mataupu. Ae ia manuia le galuega o le a feagai ai.

SINA MANATU MO LE MATAUPU:

O le uo, o se tagata ua e fa'amoemoeina ma e masani lelei i ai. O le tagata ua e alofa i ai, ma talitonuina. E mafai ona ta'aalo fa'atasi, tafafao fa'atasi, a'ai fa'atasi, ma fa'asoa fa'atasi. O le olaga lea sa molimauina i le faigauo a Tavita ma Ionatana. E mafanafana le mafutaga, ona ua masani le tasi i uiga o le isi. O foliga vaaia lea o le faigauo o lo'o fa'avae i le alofa o le isi i le tasi.

O le tasi aso, sa tupu tele ai le leaga ma le ita i le loto o le tupu o Saulo ia Tavita. Na manatu ai Saulo le tupu, e tatau ona fai se faiga e ave'ese ai Tavita mai lona olaga o aso uma. O le ala lea na ia fa'atonuina ai lona atalii o Ionatana fa'atasi ma ana auauna, ina ia latou fa'ao'o le oti ia Tavita. O le mafuaaga o le ita o Saulo ia Tavita, ona ua iloa e Saulo, ua to'atele tagata ua o latou fiafia ia Tavita nai lo o ia le tupu. E le talia e Saulo lea vaaiga, ona o ia o le tupu, e tatau ona viia ma fiafia mai tagata o lona malo ia te ia, nai lo o se isi lava tagata. Ua na o le pau lava le gaoiga e tatau ona faia, o le saili lea o se auala ina ia fasiotia ai le tama o Tavita. A o Tavita, sa ia te ia le Agaga o le Alii.

Ua sauni auauna a Saulo ina ia fa'ao'o le oti ia Tavita. Ona alu ai lea o Ionatana le atali'i o Saulo, ua fa'amatala ia Tavita lana uo, o lo'o mana'o lona Tama ina ia fa'ao'o le oti ia te ia. E tatau ia te ia ona alu e saili se mea lilo e lafi ai. O le alofa o Ionatana i si ana uo o Tavita, ina ne'i afaina i le mana'o o lona Tama o Saulo. A'o Tavita, e leai sana agasala po'o sana agaleaga sa faia ia Saulo le tupu. Ua na o lona usita'i lava i Fa'atonuga uma a le tupu, tusa lava po o le a le faigata, e usita'i lava ma fa'atino. O le mea ua faia e Ionatana, o le pine fa'amaui lea o le uo e alofa fa'amaoni i lana uo.

GALUEGA FA'ATINO: Tusiga Solo

Tusi mai se solo e fa'atatau i lau uo. Pule lava oe i le umi, ae tasi le fuaiupu.

Fa'ata'ita'iga:

O a'u e fai la'u uo i le aoga
Ma te ta'aalo ma a'ai fa'atasi pe a ta le malologa
E alofa, aulelei toe lapo'a
E ita o ia pe a le maona.

PESE: Spirit of the living God,
Fall a fresh on me
Spirit of the living God,

Fall a fresh on me
Melt me, mold me, use me
Spirit of the living God, fall a fresh on me.

IA MANUIA LE ASO SA!!

ASO SA – APERILA 21, 2024

MATAUPU: “O LOTO FUATIAIFO SA'OLOTO” (In heart and conscience free)

TUSI FAITAU: Galuega 16: 16-30

SINI: Ia a'oa'oina le vasega, e le mafai e se isi lava malosi ona taofia lo tatou ola tapua'i i le Atua i taimi o puapuaga.

FESOASOANI MO FAIAOGA:

I le suafa manumalo o lo tatou Alii o Iesu Keriso, ou te fa'afeiloa'i atu ai i lenei taeao fou ua tatou maua, talofa, talofa lava. Tatou te tau fa'i lagona uma le loto fa'agae'etia ma le agaga vivi'i i le Atua, ona o lana puipuiga malu i lo tatou ola. Ae saga'i ane loa mo le fa'atinoina o faiva o lenei taeao, ia fesoasoani mai le Agaga o le Atua i a'i tatou uma.

SINA FA'ASOA MO LE MATAUPU:

O le tatou mataupu o lenei aso e tusa ma le vaega o le tusi faitau sa faitauina, o le malaga a Paulo i Maketonia na fetaia'i ai ma nisi o le 'au uso e fesoasoani i le galuega. Fai mai ina ua o'o atu i le mea e tatalo ai, ma fetaia'i ai ma le auauna teine po'o le aitu vavalu. O lea tagata fai mai na maua ai e alii ma tagata le tele o le tamaoaiga i ana valoaga. O lona uiga ua fa'amoemoeina e le tele o tagata latou te maua mai ai oloa ma le tamaoaiga. Ae ina ua fetaia'i ma Paulo, na femulimulita'i ai loa ma ia alaga atu i tagata, “O auauna nei tagata a le Atua silisili ese, latou te tala'i atu ia te outou le ala o le fa'aolataga.”

Ua masani tagata e tusa o a latou tu ma aga e pei ona faia i le latou aitu vavalu e pei ua fai ma o latou atua e talitonu i ai. Ae ina ua o'o atu Paulo ma ia tulia i fafo i le suafa o Iesu Keriso, o i'ina na iloa ai e alii ma manatu ai ua leai so latou fa'amoemoeaga e maua mai ai oloa mo latou. Ona latou pupu'e loa lea ia Paulo ma Sila, o laua ia na faia le galuega tala'i o le talalelei ia Iesu Keriso. Ua feosofi ane tagata ma sasa i a'i laua i laua ma saei o laua ofu, ae le gata i lea ua lafo foi i le fale puipui ma fa'atonu le leoleo ina ia vaai lelei i laua. E le'i ave mea na tutupu ia Paulo ma Sila ma ala e taofia pe fefefe ai, ae ua fa'atupuina ai le la loto tetele au'a o lo'o i a'i la'ua le mana o le Agaga o l'e na valaauina i la'ua mo le galuega tala'i, o Iesu lea.

Fai mai a'o i ai i la'ua i totonu o le fale puipui, e le'i nofonofa ai, ae na o la tatalo ma pepese e vivi'i i le Atua ina ia fesoasoani mai a'o feagai ma faigata. Na fa'ate'ia uma i latou na noanoatia fa'atasi i totonu o le fale puipui ina ua fa'alogi i a'i laua. Na fa'ate'ia le leoleo o le fale puipui ma tagata uma sa i ai, ina ua lulu le mafui'e tele ma matala ai faitoto'a ma ua luluina ai le fa'avae o le fale puipui. O se vaaiga uiga 'ese fai mai ua ala le leoleo na moe, ua tago ifo i lana pelu o le a fa'aumatia ai Paulo ma Sila. Peita'i o le mea ua tupu, na alaga ma le leo tele Paulo ma fa'apea atu, “Aua ne'i faia e oe se mea e leaga ai oe; au'a o i'inei i matou uma.” O i'ina na fa'apa'u ai i luma o Paulo ma Sila le leoleo ma le gatete tele, ma ia ave loa ia'i la'ua i fafo. Na ia aioi ia Paulo ma Sila, po'o le a se mea ou te faia ina ia fa'aolaina ai a'u? Ona fai atu lea o i la'ua, 'Ina fa'atuatua ia i le Alii o Iesu Keriso, e fa'aolaina ai oe ma lou aiga.'

O le taimi lava na tautala atu ai i la'ua i afioga a le Alii, o le taimi foi lea na suia ai le leoleo, ua le gata ia te ia ae fa'apea foi ma lona aiga uma ua latou fa'atuatua i le Atua. Ioe tamaiti, a o'o ina pipi'i o tatou loto i le Alii, e leai ma se mea tatou te toe popole vale ai i so'o se mea tatou te faia. E tofu lava tatou ma

le valaauina mai le Atua, o le mea taua ia ofo atoa o tatou tagata e fa'atino ai ma le fa'amaoni.

GALUEGA FA'ATINO: Fesili fa'atupu manatu

1. O le a le 'auupega na fa'aoga e Paulo ma Sila i le galuega na feagai ma i la'ua?
Tali: O le suafa o Iesu Keriso.
2. O le a le galuega a Paulo ma Sila na fai a'o i totonu o le fale puipui?
Tali: O le tatalo ma pepese e lagi vi'iga i le Atua silisili ese.
3. O ai lea na fa'atuatua i le galuega na fai e Paulo ma Sila e pei ona ta'ua?
Tali: O le leoleo o le fale puipui ma lona aiga uma.
4. Fa'amatala mai se mea na e maua mai i le tala i au lava upu. (tu'u le avanoa i le vasega)

A'OA'OGA:

1. E leai se mea e faigata pe a tatou fa'alagolago i le mana o le Agaga Paia o le Atua.
2. O le suafa o Iesu Keriso tatou te malolosi ai.
3. Ia tatou fa'atuatua ma tatalo.

Fa'amalo atu lava mo le galuega o lenei Aso Sa, ia saili ane se pese e fetau ma le mataupu ma tofi se tama e fa'ai'u le vasega i le tatalo.

IA MANUIA LE ASO SA!!

ASO SA – APERILA 28, 2024

MATAUPU: “SUEGA LONA LUA”

SINI: Ia manatua ai pea e le fanau tala mai le Tusi Paia e pei ona fa'amatalaina i Aso Sa ta'itasi.

FESOASOANI MO FAIAOGA:

E taoto atu lava ia outou susuga i faiaoga mo le fa'atinoina o le suega, e pule foi le faiaoga pe fa'aopoopo nisi fesili pe sui foi, a o le mea taua ia fa'ataunu'u a tatou suega fa'amanatu o Masina ta'itasi. O le suega lenei, o lo'o kava ai le Masina o Mati ma Aperila, ma ia siaki lelei suega a nai tamaiti ma ia saunia ni nai meaalofoa mo latou fa'aailoga. Fai atu ai fo'i.

Tali mai fesili nei

1. O ai tagata ia na fa'alavelave ane i le galuega a Ne'emias?
Tali: O Sanepalata, o Tovia, o Gesemu ma tagata Arapi
2. O le a le ituaiga tagata e fa'amatalaina ai Ne'emias?
Tali: O se tagata e tumau i le Atua e tusa o lona valaauina.
3. Na tu'u e Ne'emias le galuega ina ua fa'alavelave ane tagata ia te ia?
Tali: E leai, na fa'aauau pea le galuega sei'a o'o ina uma.
4. Na mafai e le 'au so'o ona fai le galuega fa'amalolo, ona o le a?
Tali: Ona ua tu'uina i ai le pule ma le mana e Iesu latou te fa'atino ai le galuega.
5. O le a le uiga o le fetalaiga a Iesu, 'Aua ne'i avea se mea e tasi i la latou malaga?
Tali: E saunia e Iesu mea uma e tusa o lo latou valaauina.

6. O le a la tatou galuega e fai i lo tatou talitonuga i le toetu o Iesu?

Tali: O le tatou o atu ma tala'i atu le tala lelei e ala i le toetu o Iesu.

7. O le a se vaaiga e fa'amatala ai le a'e o Sakaio i le laau?

Tali: O le fa'ailoga o le tagata naunau lona loto ia maua se fa'afouina mo lona olaga.

8. O le a le galuega a Sakaio na galue ai i totonu o le malo?

Tali: O le ao o lafoga a tagata o le malo.

9. O ai tagata ia na liua i le galuega a Paulo ma Sila?

Tali: O le leoleo o le fale puipui ma lona aiga uma.

10. O a ni a'oa'oga taua sa outou maua mai i mataupu sa fa'amatalaina? (fa'amatala mai i au lava upu)

Fa'afetai atu mo le fa'ataunu'uina o le suega fa'amanatu a le fanau, ia maua pea o outou manatu mai le Atua e fa'atinoina ai lo outou valaauina. Ia saunia pea se pese ma fai le tatalo e fa'auma ai le vasega.

IA MANUIA TELE LE ASO SA!!

ASO SA – ME 05, 2024

MATAUPU: “VALAAU E AUAUNA I LE ATUA” (Calling to serve God)

TUSI FAITAU: 2Timoteo 2:14-26

SINI: Ia malamalama le vasega, po'o a uiga o le tagata ua valaauina e auauna i le Atua.

FESOASOANI MO FAIAOGA:

E fa'atalofa atu foi i lenei aso fou ua tatou maua i le alofa ma le agalelei o le Atua, fa'amalo foi le pale i feau ma galuega na feagai ai o le vaiaso. Talitonu lava le manatu sa tele sou taimi na faitau ai lau Tusi Paia e tusa o le tusi faitau o le mataupu o lenei Aso Sa. Ae ia manuia outou faiva o lenei taeao.

SINA FESOASOANI MO LE MATAUPU:

Fai mai la tatou mataupu o lenei taeao, 'Valaau e auauna i le Atua' A o'o ina valaauina se tasi o le fanau i totonu o le aiga i le galuega a le Atua. E muamua lava ona ave i ai e le Tama ma le Tina po'o matua foi, ia apoapoaiga ma tima'iga ina ia tautuana ma ia lona valaauina. E le mama i matua le tu'uina atu o se tasi o le fanau ua ofoina lona ola mo lea galuega, au'a foi e le o tagata uma e mafai ona ofoina o latou ola mo lea valaauina. O le ala foi lea e ta'u ai o taulaga soifua a aiga, ona e maualuga le vaai a tagata i se tagata e alu i le galuega a le Atua.

I le tusi faitau o le tatou mataupu o lenei aso, o apoapoaiga a Paulo i lona atali'i fa'aleagaga o Timoteo, ina ia tuma i le galuega. A tatou va'ava'ai i upu o le mataupu lenei, o lo'o atagia mai ai ni upu a le Tama i lona atali'i. O upu o le alofa, o le fautua a le tagata ua matua i le galuega, a o se fa'atofala'iga a le tagata ua mau lona loto i le galuega a le Atua. Silafia e Paulo e le o se tagata matua Timoteo, e le faigofie le va feso'ota'i ma tagata i le fa'atinoina o lana galuega. Au'a so'o se fa'alapotopotoga lava pei foi o Ekalesia, e le 'asa lava ma fa'afitauli ona e le tutusa uma manatu o tagata. O le ala foi lea o le tusi apoapoa'i a le aposetolo i lona atali'i fa'aleagaga, ona e tele lu'itau o le galuega, a'o lu'itau foi e tofotofoina ai le tagata galue.

Fai mai le fuaiupu e 22, 'Ia e sola ese i tu'inanau o taulele'a, ia e tausisi i le amiotonu, ma le fa'atuatua, ma le alofa, atoa ma le filemu, fa'atasi ma i latou o e valaau i le Alii ai le loto mama.' O mea ia na tiu ai le aposetolo ma fa'atino ai lona valaauina, lea ua ia fa'amalosi atu ai mo Timoteo, au'a o mea ia e tatau

ona ofu ai le tagata tau mo Keriso. O le naunauta'iga o le aposetolo, ia 'aua ne'i tosina gofie lona loto i le finau mai o tagata i mea e le tusa ma le galuega tala'i o le tala lelei. Ia a'oa'o atu ma le onosa'i ma 'ia aoa'i atu ma le agamal'u i e o finau mai, atonu e foa'i atu e le Atua ia te'i latou le salamo. O uiga uma ia e tatau ona maua e le tagata ua valaau e auauna i le Atua.

E fa'apea foi tatou tamaiti, o apoapoaiga mo Timoteo, o le fa'amalosi'au foi lea mo tatou. O le fa'amoemoe o matua, ia avea uma i tatou ma e auauna fa'amaoni i le Atua i le lumana'i. O le mea ia tatou iloa, e amata lava i le aiga lou ola auauna i le Atua e ala lea i le fa'alogoma usita'i i matua. Au'a a fa'alogoma usita'i i fa'atonuga a matua, ona manuia lea o la'asaga uma o lou olaga.

GALUEGA FA'ATINO: Toe fa'atulaga sa'o fuaiupu nei mai le tusi faitau.

1. atoa ma lea, Ia o ese i le amio leaga i latou uma o le Alii o e ta'uta'u le suafa. Ona lava tagata Ua silafia e le Alii.
2. ia e 'alo ese ai, ma le leai se uiga, aua ua iloa o mea ia A o fe'inauaiga valea, e tupu ai femisaiga.
3. na te tala'itonuina le upu moni, Ia e taumafai ina ia avea oe o le faigaluega e leai se mea ma ai, ma le ua fiafia mai i ai le Atua,

A'OA'OGA:

1. Ia tatou lagonaina le valaau mai o le Atua.
2. Ia fa'amaoni lou ola auauna i le Atua.
3. Tatou talia apoapoaiga mai matua e manuia ai.

PESE: #181 Pese ma Viiga

IA MANUIA LE ASO SA!!

ASO SA – ME 12, 2024 (Aso Sa o Tina)

MATAUPU: “UPU O LE OLA” (Words of Life)

TUSI FAITAU: Mataio 7: 1-12

SINI: Ia malamalama le vasega, o Afioga Paia a le Atua, tatou te maua mai ai Upu o le Ola.

FESOASOANI MO FAIAOGA:

Fa'amalo atu lava le onosa'i i tiute ma faiva o lo'o feagai ai ma outou, talitonu lava i le alofa o le Atua o lo'o tumua'i tutusa i tatou i lana tausiga i lo outou soifua ma lo tatou ola. O le tatou avega lava e tausoa fa'atasi ma le tatou ato e feva'ilia'i, a'o le tauologologo foi e maua ai manatu lelei e fausia ai la tatou galuega. Manatu foi sa tele se taimi na faitau ai lau Tusi Paia e tusa o le tusi faitau mo le mataupu o lenei taeao. Ae ia manuia tele le tapenaga o lenei Aso Sa.

SINA MANATU MO LE MATAUPU:

O le Upu lava ia, o se auala lea e fa'ailoa mai ai se finagalo po o se mea o i le loto o se tasi. A tatou mafaufau toto'a i ai, e tele ma anoanoa'i ituaiga o upu, o upu malie, o upu lelei, o upu fa'atupu vevesi, o upu taufaifai, o upu fa'avi'ivi'i, o upu taufa'asese, ma le anoanoa'i o isi ituaiga o upu. Ae o le tatou mataupu i lenei taeao, 'O UPU O LE OLA'. O upu aog'a tatou te maua ai le ola, e le gata i le tino, mafaufau, ae sili i le ola fa'aleagaga. O upu mai le Afioga Paia a le Atua e tatau ona tatou olaina, e pei o le faia lea o le mea sili i le isi tagata, fa'apei ona e mana'o e fai mai e le isi tagata ia te oe, au'a o le atoaga lea o le tulafono ma le 'au perofeta, lea e ta'ua o le tulafono auro, (golden rule).

O le Upu foi, ua mafai ona fa'auiga mai i le gagana Eleni i le upu o le Logos, ua fa'ailoa mai ai le

finagalo o le Atua mo i tatou. Lea e pei ona fa'aailoa mai foi i le (Ioane 1:1) e fa'apea, “Sa i le amataga le Upu, sa i le Atua le Upu, o le Atua foi le Upu”, ma o le Afioga Paia foi ia a le Atua. O le fa'aaliga manino lea o le finagalo alofa o le Atua i le tagata, lea na liutino tagata mai i le lalolagi, e ala mai ia Iesu lona Alo, (incarnation), aemaise o lana galuega fa'amisionare, atoa ai ma lona alofa tunoa, e ala i le fa'aolataga na ia saunia mo le lalolagi uma. Ae le gata i lea, o le Upu foi o le mana silisili'ese lea o le Atua na Ia fausia ai le lalolagi ma mea o i ai, au'a na o na Ia fetalai lava ona i ai lea o mea uma. (Eperu 11:3)

I le faitauga la o lenei aso, mai le Evagelia a Mataio mataupu e 7 e o'o i le mataupu e 9, o le fatu lea o le galuega e pei ona fa'aailoa mai i le mataupu e 4 e o'o i le mataupu e 16, lea e fa'ataua i a'oa'oga ma galuega fa'amalolo a Iesu i le nu'u o Isaraelu, fa'atasi ai ma lo latou te'ena o Ia. Ae, i le tau amataina mai o le Ekalesia, o le Evagelia muamua lea i le fa'asologa o Evagelia ua fauina ma ta'ita'iina loto o tagata Kerisiano i ala o Iesu Keriso.

Ua fa'atatauina lenei Evagelia mo le fa'alapotopotoga o tagata Iutaia le talitonu, atoa ai ma tagata o nu'u ese, e tusa ma lo latou iloa ma lo latou fa'alagolago i Tusi Paia Eperu, fa'atasi ai ma lo latou fa'anaunauga ia Iesu, o Ia o le Mesia o tagata Iutaia, ua fa'ataunu'uina ai le finagalo o le Atua sa valoiaina.

O se fa'amanatu foi lea o le tatou mataupu i lenei taeao, o le tatou olaina ma le taliaina o Upu o le Ola, o lo tatou mulimuli lava lea i ala o le Alii o Iesu, e aofia ai le ofoina atoa o lo tatou talitonuga ma le fa'atuatuga i le Atua, o le fa'amaoniga lea o lo tatou fa'atinoga o lona finagalo. E ao ai i so'o se Kerisiano ona agalelei atu i isi uso, ae 'aia le fa'amasino atu, a 'ia ofo atu so o se mea e mana'omia I e o mo'omia ia tulaga uma.

GALUEGA FA'ATINO:

1. Tusi mai ni fa'ata'ita'iga o Upu o le Ola mai le vaega o le tusi sa faitauina mo le mataupu.

2. Uiga o Upu:

i) utupoto - O se laau lapoa e fa'aoga i fale Samoa.

ii) uli - maile, ta'ifau

A'OA'OGA:

1. Ia tatou filifili i Upu o le Ola tatou te savavali ai.

2. E le na o Upu, ae ia fa'atino ma ola ai.

3. Toaga e faitau le Tusi Paia, e maua mai ai Upu o le Ola.

PESE: Laulau mai pea ia tei matou.....(#371, Pese ma Viiga)

TATALO: Fa'afetai le Atua i Upu o le Ola ua matou fa'alogologo i ai e ala mai i le Tusi Paia, e fai lava lea ma fa'amanatu i lo matou ola, ina ia matou savavali tonu ai i ou ala e manuia ai. Fesoasoani mai pea e ala i lou Agaga, matou te malolosi ai lava. Fa'amagalo i matou le fanau agasala...Ona o Iesu la matou uo...AMENE.

IA MANUIA TELE LE ASO SA!!

ASO SA – ME 19, 2024 (Aso Sa Penetekoso)

MATAUPU: “TALA LELEI MO E SAUAINA” (Good news for the Oppressed)

TUSI FAITAU: Isaia 61: 1-3

SINI: Ia malamalama le vasega o le Tala Lelei, e mafai ona avea lea ma fa'amalosi'au mo e ua sauaina.

FESOASOANI MO FAIAOGA:

E fa'afeiloa'i atu foi i lenei taeao fou ua tatou maua, talitonu lava i le agalelei mai o le Atua o lo'o maua

e outou uma le soifua manuia ma le lagi e mama. O le aso foi lenei tatou te fa'amanatuina ai le afio ifo o le Agaga Paia ma fa'atumuina ai le 'auso'o au'a le galuega folafola o le Tala Lelei. Manatu o le galuega lava lea o lo'o fa'aaauu pea e tatou, e tusa ma lo tatou valaauiina mai le Atua. E ao lava ona tatou fa'atalitali i le Agaga, ma ia faia la tatou galuega ma le fa'amaoni. Ia manuia le tapenaga.

FESOASOANI MO LE MATAUPU:

O le taeao lenei o le Aso Sa Penetekoso. O le Penetekoso, na atoa i ai le 50 aso talu ona mae'a le toetu manumalo mai o Iesu, ua afio o Ia i le lagi, ae sa fa'atalitali i ai le auso'o i Ierusalemia i le afio ifo o le Agaga Paia e fa'atumuina ai i latou, au'a le galuega folafola o le Tala Lelei. O le aso foi lea sa fa'ailogaina e tagata Iutaia mo faiga taulaga o ulua'i fua o seleselega o fa'atoaga, (festival of weeks), ma o le aso foi lea ua fai nei ma aso fanau o le Ekalesia, au'a na amataina ai le ulua'i Ekalesia i le lalolagi. O le Tala Lelei fa'akerisiano, o se tala fiafia, o le tala i le alofa o le Atua, o le tala e uiga i le malo o le Atua, fa'atasi ai ma Iesu Keriso lona Alo.

E femolimaua'i lava le Feagaiga Tuai ma le Feagaiga Fou o Afioga Paia a le Atua. O le tele a o valoaga a perofeta mai le Feagaiga Tuai, lea lava ua taunu'u uma i le Feagaiga Fou. O le tusi foi lea a le perofeta o Isaia sa tatou faitauina, o lea foi e toe fa'aoga mai e Iesu i le Feagaiga Fou, (Luka 4:18,21). E fa'apei foi o le soifua mai o Iesu i le lalolagi, lea foi sa valoia e perofeta e pei o Mika 5:2, Sakaria 9:14 ma Isaia 7:14. E fa'apena le tatou mataupu i lenei taeao. Tala Lelei mo e sauaina, ae e agava'a lava foi i ai ma so o se tagata i le Tala Lelei o le alofa tunoa o le Atua.

O le tusi faitau la o lenei aso, o lo'o i ai le amataga o le faitauga a Iesu i le sunako i Nasareta, lea na ia fa'aילוaina ai i lona nu'u e fa'apea, 'O le aso nei ua taunu'u ai ia te a'u afioga uma e pei ona outou fa'alogi ai, "Ua i ou luga le Agaga o le Alii, au'a ua na fa'au'u mai ia te a'u e folafola le Tala Lelei i e matitiva, ua auina mai a'u e ia e fa'amalolo i e loto momomo, e tala'i le sa'olotoga i le tafeaga, ma ia pupula mata o e tauaso, ma tu'u sa'oloto i e ua sauaina" (Luka 4:18,21). O i na fa'aילוa ai e Iesu i lona nu'u, o le Tala Lelei ua aumaia, o le toe fa'afo'isia lea o le sa'olotoga mo e saisaitia ma sauaina, ma e ua le maua atoatoa le soifua manuia. Ioe, o le Tala Lelei, e fa'aliliuina ai le ua sauaina, ma l'e o faia sauaga. O le Tala Lelei, o le avatu lava lea o le ola i so o se vaega o le foafoaga fa'apei ona finagalo ai le Atua.

O le tatou talanoa ai la i e sauaina ma e o faia sauaga e fa'apea, e foa'iina atu ia te i latou le matagofie e sui ai le lefulefu, o le olioli e sui ai le fa'anoanoa, o viiga e sui ai le loto fa'avaivai, o le tatou talanoa lava lea i le fa'amagaloga, ae a le togiola na faia e Iesu mo i tatou uma.

O se fa'amanatu mai foi lea o le tatou mataupu aemaise o le Tala Lelei mo i tatou le fanau, ia tatou iloa ona alolofa ma fa'amagaloga i isi o tatou uso o mafatia ma a'afia i sauaga ma puapuaga. Ia ofoina i ai le fesoasoani aemaise o le fa'aילוa i ai o le Tala Lelei e uiga i le alofa o le Atua, ia fa'aילוaina ai i e ua sauaina ma so o se tasi o ola pea i le pogisa, ma i latou o faia pea sauaga leaga ma sauaga mataga.

GALUEGA FA'ATINO:

1. Fetufaa'i le faiaoga ma le vasega....Pe aisea ua taua ai le galuega na faia e Iesu Keriso, e ala i lona Malia ma lona Toetu.... "O le Tala Lelei"?

A'OA'OGA:

1. Alofa i le Atua ma l'e lua te tuaoi.
2. E le fiafia le Atua i e faia sauaga i isi.
3. Ia tatou iloa ona alolofa ma fa'amagaloga atu i isi o lo'o mafatia.

PESE: Pese ma Viiga 247

ASO SA – ME 26, 2024

MATAUPU: “SUEGA LONA TOLU”

SINI: Ia su'esu'eina pea mafaufau o le fanau e tusa o tala mai le Tusi Paia sa fa'amatalaina i mataupu o Aso Sa ta'itasi o le Masina.

FESOASOANI MO FAIAOGA:

Ua tatou o'o mai i le Aso Sa mulimuli o lenei Masina, malo lava le onosa'i fa'afetai le galulue. E i ai lava le lagona ua ia te outou le fa'atinoina o a tatou suega fa'amanatu o le Masina. Ae o le tu'ualalo lava ina ia fa'ataunu'u a tatou fa'amanatu mo le lelei o a tatou fanau i le lumana'i. Ae taoto atu lava i le faiaoga i le auala e fa'atino ai.

Vaega 1: Taliga fesili

1. O ai sa apoapoa'i ai Paulo ina ia tumau i le galuega?

Tali: O lona atali'i fa'aleagaga o Timoteo.

2. Aisea ua mafua ai ona tusi apoapoa'i Paulo ia Timoteo?

Tali: Ona e le o se tagata matua Timoteo e faigofie lava ona gaua'i lona loto i upu a tagata.

3. O le a se a'oa'oga na e maua mai i le tusi a Paulo ia Timoteo lona atali'i fa'aleagaga?

4. Se a le mea e te vaai atu ai i si fasi laau i le mata o lou uso, a e te le iloa e oe le utupoto i lou lava mata? O le a le uiga o lea fuaitau?

Tali: O lona uiga, aua e te vaai fua i le leaga o le isi tagata, ae vaai lava oe ia ia te oe ma ou leaga.

5. O le a le uiga, Upu o le Ola?

Tali: O le Upu mai le Afioga Paia a le Atua, o le Upu e i ai le mana e ola ma savali ai le tagata.

Vaega II: Fa'auma fuaiupu

1. Au'a ai se ole atu, e maua e ia, o l'e saili foi, e iloa e ia, _____.

Tali: e toina foi i l'e tu'itu'i atu.

2. _____, ina ne'i fa'amasinoina outou.

Tali: Aua tou te fa'amasino atu

3. Ua i o'u luga le _____ o le Alii le Atua; au'a ua _____ a'u e le Alii e tala'i le tala lelei i e ua _____, ua ia auina mai a'u e _____ i e loto _____, e tala'i le _____ i le _____, ma le matu'a _____ o e ua _____.

Tali: tigaina, fufusi, Agaga, momomo, fa'au'uina, tafeaga, sa'olotoga, fusifusia, tatalaina.

4. Tusi mai sau solo e fa'amatala ai uiga o lou Tina. (aua ne'i umi)

5. O le Penetekoso, o le afio ifo o le Agaga Paia ina ia fa'atumuina ai le 'auso'o mo le galuega tala'i. Sa'o & Sese

Tali: Sa'o

Fa'afetai mo le fa'ataunu'uina o le tatou suega fa'amanatu, ia saunia se pese ma fa'ai'u le vasega i le tatalo.

IA MANUIA TELE LE ASO SA!!

ASO SA- IUNI 02, 2024

MATAUPU: “O LE FAFAGAINA O LE 4,000” (The feeding of the 4,000)

TUSI FAITAU: Mareko 8:1-13

SINI: Ia a'oa'o tamaiti ina ia mae'a le mataupu, ae ua malamalama i le olaga le talitonu o le 'auso'o ma le mana faivavega o Iesu.

FESOASOANI MO FAIAOGA:

O upu a le atunu'u, 'E tu manu ae le tu logologo', e fa'apena se lagona o lenei aso ua mafua ai se manatu fa'atauva'a. Manatu ua se taimata i la outou silasila ae ao lava ona tu'itu'i atu pea, matou te 'augofie foi e fa'amanatu atu pea ina ia lava lou taimi e su'esu'e ai ma saili'ili e tusa o le tusi faitau o le mataupu, ina ia nanea ai pea se feau momoli mo le fanau. Ia manuia le tapenaga.

SINA FA'ASOA MO LE MATAUPU:

O le tatou mataupu o lenei taeao, o le fafagaina e Iesu o le motu o tagata e to'atele. O le taimi a'o fa'agasolo pea le galuega a Iesu ae o lo'o va'ava'ai pea lona 'auso'o. O le to'atele o le motu o tagata ua lolofi atu ma mafuta ma Iesu, e ese'ese uma lava mea e omai ai i latou. Fai mai o le tolu o aso, ua lagona le fia 'a'ai o tagata ae leai ni a latou meaai o i ai. Ua silafia e Iesu ona fa'apea atu lea, 'Ou te alofa atu i le motu o tagata, au'a o le aso tolu lenei o matou o nonofo ma a'u, e leai foi ni a latou mea e 'ai; afai foi ou te tu'uina atu ia te i latou e o i o latou aiga, o matelaina, e lailoa i latou i le ala; au'a e mamao mea na o mai ai nisi o i latou.' O le fetalaiga lea a Iesu i lona 'auso'o, ae tali le 'auso'o, 'Maifea e mafai ai se tasi ona fafaga ia te i latou i areto i lenei vao?

O le fesili a le 'auso'o, ua ta'u mai ai le le saunia ma le le malamalama o le 'auso'o ia Iesu. O le vaai a le 'auso'o e pei foi o tatou pe a mafaufau i ai. E fa'afea ona fafaga lenei anoano o tagata i nei areto e fitu ma nai i'a iti na i ai. Peita'i, o lea foi e tau a'oa'o foi le 'auso'o ia ina ia lava tapena mo le galuega fa'aso'o. E le na o le motu o tagata o lea e fai i ai le galuega a le Alii o Iesu, ae o lea foi e tapena fa'atasi lava ma ona so'o filifilia. O le fa'amoemoe maua lava o Iesu, ia talitonu ma fa'atuatua lona 'auso'o mo le galuega, au'a e le tumau pea le latou mafutaga e pei ona i ai. O le isi lea vavega mata'utia na faia e Iesu, o le fitu areto ma nai i'a lauiti, fai mai ua le gata ina 'a'ai ua mao'ona, ae ua fu'e mea na totoe ua maua ai isi ato e fitu.

Ona tu'uina atu loa lea o le motu o tagata e o, ae ua fa'aauau le latou galuega ma lona 'auso'o. Ioe tamaiti, ua tu'uina atu tagata e o ma ta'uta'u atu mea na latou molimau i ai. Ua o ma le loto talitonu e mafaia e Iesu ona faia vavega mata'utia ma ofoofogia i le ola o le tagata. Ua fa'amanatu mai foi lenei tala mo tatou o isi foi so'o o Iesu. Ia tatou o ma le mautinoa e saunia e Iesu mea uma mo le galuega tala'i, tatou o tapenapena ma sauniuni mo taimi faigata o le olaga. O le tatou savaliga o lo'o faia i lenei olaga, ia tatou sauni i so'o se taimi au'a e le sologa lelei pea aso. Tatou o ma le loto talitonu ma fa'atuatua, e le tu'ulafoa'ia i tatou e Iesu lo tatou Fa'aola.

GALUEGA FA'ATINO: Taliga fesili

1. O le fia o aso lea na i ai Iesu ma le motu o tagata i le vao lea na ta'ua i le tala?
Tali: O le tolu o aso
2. E fia areto lea nai le 'auso'o ina ua fesili i ai Iesu?
Tali: E fitu areto
3. Ae to'afia tagata na fafagaina i areto e fitu ma nai i'a lauiti?
Tali: E fa'afe tagata
4. O le a la se mea ua e maua mai i lea tala? (fa'amatala mai i au lava upu)

A'OA'OGA:

1. E fai vavega Iesu i lou ola taumafai.
2. Ia tatou ola saunia i taimi uma.
3. E saunia e le Atua mea uma pe a tatou talitonu ma fa'atuatua ia Iesu lo tatou fa'aola.

PESE: Lo'u Atua e, ua ou fia'ai, ia e fafaga ia te a'u
Lo'u Atua e, ua ou fia'ai, ia e fafaga ia te a'u.
Fafaga ia te a'u i aso uma o lo'u ola,
Fafaga ia te a'u i le manai mai luga
Fafaga ia te a'u, i au Afioaga.
Fafaga ia te a'u, i aso uma o lo'u ola.

A uma ona tatou faia o se galuega, ona tatou fa'apea ifo lea, o tatou o auauna le aoga, fa'afetai tele mo le galuega o lenei Aso Sa. Ia tofia se tama'ita'i e fai le tatalo ma fa'ai'u ai le vasega.

IA MANUIA LE ASO SA!!

ASO SA – IUNI 09, 2024

MATAUPU: “O LE MUAMUA E TATAU ONA MULIMULI” (The first must be last)

TUSI FAITAU: Mareko 9:33-37

SINI: Ia malamalama le vasega, po'o le a le uiga o le mataupu e tusa ma le tala o lo'o aumai e le tusi faitau.

FESOASOANI MO FAIAOGA:

Malo le folau fa'afetai le tauata'i i o outou faiva alofilima i lea aso ma lea aso. Viia le Atua i lona agalelei ma lona alofa mo i tatou o lana fanau. E ui lava ina fesoua'ina la tatou folauga i peau lagavale o le olaga, ae fa'afetai e le o tu'ulafoa'ina lava i tatou e le Atua. Fa'afetai atu foi ia te outou le onosa'i e tusa ma lo outou valaauina i lea foi itu o le galuega a le Atua. Talitonu lava o lo'o sologa lelei mea uma e ala i le fesoasoani mai o le Agaga o le Atua e tauto'alua ma lo tatou vaivai. Ia manuia lau tapenaga.

FESOASOANI MO LE MATAUPU:

O le natura masani lava ia fa'aletagata, e tele lava ina avea le naunau i le pule ma ala e finau vale ai, ma o'o ai lava ina uia auala sese ma le pi'opi'o. A o'o foi la ina finau, e le mafai lava ona fia to'ilalo e tusa lava pe na te iloa e sese ae mana'o lava e malo lana finau. E tupu pea lea tulaga e le gata o totonu o aiga, ae fa'apea foi i nu'u o atunu'u ma le Ekalesia ma so'o se fa'alapotopotoga lava. Atonu o le isi lea mafua'aga tele o le tula'i mai o vevesi, o taua ma misa i le lalolagi, o le fefinaua'i ma le tausili po'o ai e sili a'o ai foi e pule.

O le tatou tusi faitau o lenei aso, o lo'o aumai ai le fefinaua'i o le 'auso'o i le ala po'o ai e sili o i latou, a o aga'i atu ma Iesu i Kapanauami i la latou malaga. Silafia lelei e Iesu loto o lona 'auso'o, ua fia sili foi le 'auso'o latou, ae galo ai e leai lava se tasi e sili atu nai lo le Alii o Iesu. Fai mai le fetalaiga a Iesu i ona so'o, “Afai e fia muamua se tasi, ia avea o ia ma mulimuli i tagata uma, ma auauna a tagata uma.” E le taugamalie i le fa'alogo a le 'auso'o lea tala, ae o le mea ia manino i ai le 'auso'o, e le se mea faigofie le mea o lo'o latou fefinaua'i ai. O le fuaitau a Samoa, 'O le ala i le pule o le tautua', e fa'apena foi le finagalo o Iesu mo lona 'auso'o. Ia fai i latou ma auauna i tagata ae aua ne'i auauna mai tagata i a'i latou, au'a o le mea lea na sau ai Iesu i le lalolagi.

Ae le gata i le na, na fa'atu foi e Iesu le tamaitiiti i o latou luma ma fa'apea atu, 'Ai se talia se tamaitiiti fa'apenei i lo'u nei igoa, ua talia e ia o a'u, ai se talia a'u, e le o a'u ua ia talia, a o ia na auina mai a'u.' O le a le uiga o lea fetalaiga a Iesu? O le tamaitiiti, e le taulia i le vaaiga a ia atunu'u, a o lea ua fa'atusa ai e Iesu o Ia i lona 'auso'o. Ae a tatou mafaufau i se isi vaaiga, o le tamaitiiti e le gata e mama lona

mafaufau, ae faigofie foi ona usita'i ma fa'alogo i lona Tama. O lona uiga i le manatu o Iesu mo lona 'auso'o, ia liua o outou mafaufau pei o tamaiti, ona mafai lea ona outou usita'i ma fa'alogo mai, aemaise ia latou talitonu ia Iesu ma ana a'oa'oga.

Tamaiti, e leai lava se mea e maua ma le filemu, e le otomeki foi ona e pa'i i ni tulaga maualuga, e tatau lava ona e tigaina muamua ma e fa'amaoni, ona e maua lea o fa'amanuiaga e tele i le lumana'i. E taua lou fa'alogo ma usita'i i ou matua, au'a o le la'asaga muamua lava lena o lau sailiga mo lou lumana'i manuia.

GALUEGA FA'ATINO:

1. O ai na fefinaua'i i le ala?

Tali: O le 'auso'o o Iesu.

2. A o le a le mea na fefinaua'i ai?

Tali: Na fefinaua'i po'o ai e sili o i latou.

3. O le a le fetalaiga muamua a Iesu na fai i lona 'auso'o?

Tali: A fia muamua se tasi, ia avea o ia ma mulimuli i tagata uma, ma auauna i tagata uma.

4. Ae o le a le uiga o lea fetalaiga a Iesu?

Tali: A fia avea oe ma ta'ita'i, ia e auauna ma galue muamua.

A'OA'OGA:

1. O le fa'amaoni o le tagata, e pa'i ai i mea sili.

2. Aua le finau vale.

3. Aua le naunau i le pule.

Fa'afetai tele mo le galuega sa fitaituga ai o lenei aso, ia fa'amanuia le Atua. Ia saili se pese mo le mataupu, ma fai e le faiaoga le tatalo e fa'auma ai le vasega.

IA MANUIA LE ASO SA!!

ASO SA – IUNI 16, 2024 (Aso Sa o Tama)

MATAUPU: “LEOLEO MAMOE LELEI” (Good Shepherd)

TUSI FAITAU: Salamo 23

SINI: Ia malamalama le vasega, o le Atua o le leoleo mamoe lelei.

FESOASOANI MO FAIAOGA:

Fa'amalo le folau, malo le onosa'i i lo outou paia maualuga i faiaoga Aso Sa. Ou te talitonu o lo'o manuia i tatou uma i le alofa tausii mai o lo tatou Matai sili o i le lagi. Viia le Atua ina ua ia ta'ita'i mai lo outou soifua e fa'aauau lo tatou valaauina i lenei taeao fou. Talofa lava, talitonu foi sa faitau lau Tusi Paia i le vaiaso, e tusa o le tatou mataupu. Ia manuia lau tapenaga.

SINA MANATU MO LE MATAUPU:

O le tatou mataupu mo lenei aso ua fa'aulutalaina “Leoleo mamoe lelei” I le mataupu sa tatou faitauina o lo'o manino ma malamalama ai, o le leoleo o lo'o autu i ai le Salamo o le Atua. Lea lava e ta'utino e le fai Salamo e fa'apea, “o le Alii o lo'u leoleo mamoe lelei o Ia, e leai se mea ou te mativa ai”. E mafai ona fa'amatalaina e ia upu le uiga o le mataupu atoa lenei. O lo'o aumai e le fai Salamo le ata o le leoleo mamoe e fa'amatala ai lo la va feso'ota'i ma le Atua i aso uma o lona ola.

O le Salamo lenei e 23, ua masani ai la outou fa'afofoga, au'a e taulotoina i lotu fa'aleaiga i afiafi

ta'itasi. O le Salamo foi e ese'ese ai manatu o le au atamamai o le Tusi Paia i lona mafua'aga. O isi talitonuga o le Salamo e uiga i le taumafai o Saulo e saili se aualea e fasiotiina ai Tavita, o isi talitonuga o le taimi na taumafai ai Apisaloma e fouvale ma faoa le malo mai lona Tama. O le isi talitonuga o le Salamo e fa'amanatu ai le aso lavea'i o le Atua a'o i ai Isaraelu i Aikupito. Peita'i o le isi talitonuga o lo'o fa'atatau lava le Salamo i faiva fa'aleoleo mamoe o Tavita i le lafu a lona Tama. O ona tiute ma ona faiva e le faigofie ae sa ia faia lava ma le fa'amaoni ma lona soifua fa'atuatua i le Atua. O lona fa'amaoni lea na afua ai ona tofofi mai ai o ia e le Atua e fai ma tupu i lona nu'u.

Tu'u ia po o le a le mafuaaga na tusia ai le Salamo, ae fia fa'ataua e le tatou mataupu le uiga o le Salamo ma se feau taua o lo'o fia momoli mai mo i tatou. O le fa'aogaina o le ata fa'aleoleo mamoe e fa'amatalaina ai le va feso'ota'i o le Atua ma le tagata. O lo'o aumai ai se ata o le galuega tele o lo'o faia e le Atua i aso uma ma taimi uma o lo tatou ola. O le fa'aiologa o le Atua auai. O le fa'amatalaina o le to'oto'o, o lo'o aumai ai se ata o le a'ao ta'ita'i o le Atua, ma lana puipuiga malu i lo outou soifua ma lo tatou ola. E fa'amatalaina foi e le to'oto'o le pule aoao a le Atua i mea uma lava.

O le fa'amanatu o le tatou mataupu mo i tatou uma, o le Alii o lo tatou leoleo mamoe lelei, e silisili i mea uma lava. Na te puipui ma lavea'i i tatou i mea uma, o ia foi na te ta'ita'i i tatou i ala tatou te manuia ai.

O le Aso Sa fo'i lenei tamaiti ua fa'apitoa mo Tama. O le aso e fa'amanatu ai le sao taua o Tama i totonu o le nu'u ma le Ekalesia ae o aiga fo'i. O isi ia tiute a Tama o lo'o fa'atino mo fanau, o le leoleo ma tausii ina ia malu puipua le aiga, ia manuia ma sa'oloto i tatou le fanau i mea uma. E le mana'o e fia'a'ai pe ola falol'o tatou fanau. Ia tatou tatalo ma fa'afetai I le Atua ona o Tama ma lo latou sao taua. Ia manuia tele le Aso Sa o Tama.

GALUEGA FA'ATINO: Ta'aloga (Blind Fold)

Ia ta'ito'alua ona noanoa lea o mata o le tasi ae ta'ita'i e le isi. E fa'amoemoe le ua noanoa mata i le ta'ita'iga a lona soatau. E fa'apena le savaliga a le tagata fa'atuatua, e alu lava ma le mautinoa ma le fa'atuatua o lo'o ta'ita'i o ia e le Atua.

A'OA'OGA:

1. O le Atua o le leoleo mamoe lelei.
2. E auai le Atua i mea uma.
3. Ia tatou mautinoa ma le fa'atuatua, e ta'ita'i tatou e le Atua.

PESE: #175 Pese ma Viiga.

Ia tofia e le faiaoga se tama e fa'ai'u le vasega i le tatalo.

IA MANUIA LE ASO SA O TAMA!!

ASO SA – IUNI 23, 2024

MATAUPU: “IOSEFA, TU'UINA ATU I AI LE MALOSI TELE” (Joseph entrusted with great power)

TUSI FAITAU: Kenese 41: 33-46

SINI: Ia malamalama le vasega, o le malosi o le Atua na mafua ai ona pule Iosefa i Aikupito.

FESOASOANI MO FAIAOGA:

Ua tatou i le si'ui o la tatou galuega i le afa muamua o lenei tausaga, fa'amalo le galulue fa'afetai le onosa'i, o lo'o silafia e le Atua lo outou tautiga i lana feau ma lana galuega, o ia fo'i na te toe fa'amanuia atu i le tagata ma lana. Manatu lava sa fai lau su'esu'ega mo le tusi faitau o le tatou mataupu o lenei aso. Ia manuia le fa'asoa.

FESOASOANI MO LE MATAUPU:

O le tala ua tatou faitauina mo lenei Aso Sa, o le fa'aeaina lea o Iosefa i totonu o le malo o Aikupito ina ua tofia o ia e Farao e fai ma alii sili e pule i le malo atoa. Lenei tofiga ua tu'uina atu ia te ia, ona o lona mafai ona fa'amatalaina o miti a Farao. Ua pule ma fa'aaloaloga Iosefa e tagata uma o Aikupito, ma ua ia galue foi e atia'e le malo atoa ina ia tapena e teu ma fa'aputu saito mo le fa'aogaina pe a o'o mai tausaga e fitu o le oge. O Iosefa o le tama Eperu sa fa'amaoni ma fa'alagolago i le Atua, lea lava ua o'o ai ina fa'aeaina ma fa'amanuiaina lona olaga i totonu o nu'u ese. O ala ia e le'i mafaufauina e Iosefa au'a sa feagai o ia ma le tele o fa'afitauli, mai lava i totonu o lona aiga i le va o ia ma ona uso, ae fa'apea fo'i i Aikupito ina ua tu'uina atu o ia i le falepuipui.

A o i tatou te iloa ai le malosi tele o lo tatou Atua sa auauna ma fa'alagolago i ai Iosefa. Le malosi lea na Ia tu'uina atu ia Iosefa na mafai ai ona ia tete'e atu ma fa'ato'ilaloina ai fa'afitauli na tutupu ia te ia, a o le malosi lava lea na mafai ai ona ia fa'amatalaina miti a Farao ma fa'aeaina ai o ia e pule i Aikupito atoa. E ese le malosi tele o le Atua sa auauna ma tautua i ai Iosefa, au'a o lea lava ua fa'aalia lana pule aoao e le gata o Isaraelu ae fa'apea foi nu'u ese. Le malosi tele lea sa i le loto o Iosefa na mafai ai ona ia onosa'ia tiga ma fa'aosoosoga na o'o ia te ia, aemaise ai o lona tumau pea lea ma fa'alagolago i lona Atua ma lona talitonuga, e leai se mea e faigata ia te Ia.

Tamaiti, e ese le matagofie o lenei tala e uiga ia Iosefa ma mea uma na faia e le Atua ia te ia. O lea ua tatou mautinoa nei o le malosi tele na tu'uina atu e le Atua ia Iosefa, na mafai ai ona malosi lona loto e tumau pea i le Atua, ma ia fa'ato'ilaloina ai fa'aosoosoga a le tiapolo na semau a fano ai lona ola. Lea lava na o'o ina fa'aeaina e Farao e fai ma pule o Aikupito atoa, ona o lona fa'amaoni ma lona loto tele. O a fa'afitauli e tutupu i lo tatou ola, manatua le Atua o lo'o fa'atasi mai pea mo tatou i taimi uma ma aso uma. Na te le tu'ulafoa'iina i tatou pe afai tatou te fa'amaoni ia te Ia i aso uma o lo tatou ola. Ia tatou toa'aga e mafuta ma fa'alagolago i le Atua e ala i le tatalo, ta'aga i le lotu ma le aoga Asa Sa fa'apea aoga o lo'o ao'oga ai. Ia fa'alogologo ma usita'i i matua, Faifeau ma so'o se tasi lava. A tatou fa'amaoni i nai mea iti ia, ona aumai lava lea e le Atua o le malosi tele i o tatou loto e mafai ai ona tatou faia so o se mea lelei ma fa'aeaina ai i tatou i fa'amanuiaga ese'ese e foa'iina mai e le Atua.

GALUEGA FA'ATINO: Fa'afetaui upu ma o latou uiga

1. tausaga mau -- feoti
2. oge – o le fa'aali o mea lilo
3. fano – vaitaimi e tele ai meaa
4. sapenapaenea – leai ni meaa

A'OA'OGA:

1. Tatou te mafaia mea uma i le fa'atasi mai o le Atua.
2. E aumai e le Atua le malosi e fa'atino ai a tatou galuega.
3. E pule aoao le Atua i mea uma.

PESE: Olioli i le Alii o lo'u malosi lea
Olioli i le Alii o lo'u malosi lea.
Ha ha ha ha, aleluia, Ha ha ha ha, aleluia.
Olioli i le Alii o lo'u malosi lea.

IA MANUIA LE ASO SA!!

ASO SA – IUNI 30, 2024

MATAUPU: “SUEGA AFA MUAMUA TAUSAGA”

SINI: Ina ia fai ma fa'amanatu i le fanau le taua o tala o le Tusi Paia, ia le gata o le fa'alogo i ai, ae ia teu fatu ma ola ai e manuia ai o latou olaga.

FESOASOANI MO FAIAOGA:

E le fa'aitiitia le agaga fa'afetai i le Atua ona o lana ta'ita'iga mana i lo outou soifua ma lo tatou ola, lea ua mafai ai ona tatou aulia mai le fa'ai'uga o a tatou galuega i le afa muamua o lenei tausaga. Malo le onosa'i fa'afetai le fa'atoatoa, e ui lava sa tele faigata ma fa'afitauli sa feagai ma tatou i le ala, a o lea lava ua tau i man'u lo tatou fa'amoemoe. O le tatou suega mulimuli lenei o le afa muamua o lenei foi tausaga, e taoto atu lava ua ia te outou le fa'atinoina, ae ia tautuana ni nai fa'aailoga mo nai tamaiti e fa'afiafia ai pea o latou loto, ma fa'aosofia ai pea le naunau i le aoga Aso Sa.

Vaega 1: Tali mai fesili nei

1. E ave gofie la'u amo, o la'u avega foi e mama ia. O le a le uiga o lea fetalaiga a Iesu?

Tali: Ia tatou tauave fa'atasi ma Iesu mea uma tatou te mafatia ma saisaitia ai.

2. O le a lea mea e ta'u o le 'suotosina' e pei ona ta'ua i le mataupu sa fa'amatalaina?

Tali: O se mea faigaluega e fa'aoga e fa'amal'u ai le palapala.

3. O ai lea tagata o Ne'emias a'o a foi ni ona uiga ma sona aoga e a'oa'o mai mo tatou?

Tali: O le auuna a le Atua, o ia lea na ia lototele e toe foi e fausia le pa o Ierusalem sa fa'alegaina.

4. E fa'apefea ona maua e Ne'emias lea ituaiga loto tele e pei ona fa'amatalaina?

Tali: O le tagata e mau lona loto talitonu i lona Atua, ma fa'atuatua i ai.

5. O le a se feau momoli mai i le a'e o Sakaio i le laau o le Sukamoru?

Tali: O le fa'aailoga o le tagata ua naunau ina ia maua se fa'afouina i lona loto.

6. O le a le mea sese a Sakaio sa fai, ua fia maua ai se fa'aolaina mo ia?

Tali: Ua ia ao fa'asili lafoga a tagata ina ia maua ai sana tupe.

7. O ai na liua i le galuega a Paulo ma Sila?

Tali: O le leoleo o le falepuipui ma lona aiga.

8. Aisea na tusi ai Paulo ia Timoteo?

Tali: Ina ia tumau lona loto i le Atua, ia maua le onosa'i e fai ai le galuega.

9. O le a le tofiga ua filifilia i ai e Farao Iosefa?

Tali: E pule i Aikupito atoa.

10. O ai foi le isi igoa o Iosefa, a o le a foi lona uiga?

Tali: O Sapenapaenea, o lona uiga 'o le fa'aali o mea lilo.

11. O ai le igoa o le to'alua o Iosefa?

Tali: O Asenati

12. A o ai le igoa o le Tama o Asenati, o ia foi o le a?

Tali: O Potifere, o ia o le ositaulaga.

13. O ai le leoleo mamoe lelei?

Tali: O le Atua.

14. O le a se feso'ota'iga o le leoleo mamoe lelei ma le taua o Tama?

Tali: O le tiute foi lea o tama, o le puipui ma lavea'i le fanau ma le aiga.

15. O a ni a'oa'oga sa e maua mai i le tele o mataupu sa fa'amatalaina? (tusi mai ia le silia ma le laupepa e tasi lau tali)

Vaega 11: Fa'atumu avanoa i upu nei

agamalu, onosa'i, salamo, tiapolo, fa'amisa, auauna, mailei, mafaia, tatau, foa'i, finau mai, ala, finagalo.

Au'a e le _____ ona _____ o le _____ a le Alii, a ia _____ i tagata uma, ia _____ ona a'oa'o atu, ma ia _____, ia a'oa'i atu ma le agamalu i e o _____ mai; atonu lava e _____ atu e le Atua ia te i latou le _____, ina ia latou iloa lelei le upu _____; ia latou _____ mai foi na moe i le _____ a le _____, o e ua maua e ia, e fai lona lava _____.

A uma ona tatou faia o se galuega ua lelei, ona tatou fa'apea ifo lea, o tatou o auauna le aoga i tatou. E fa'apena se lagona e fa'a'ilo atu ai le agaga fa'afetai tele e tusa ai o le galuega na feagai ai ma outou I le afa muamua o lenei tausaga. O la le aposetolo o Paulo, 'E le se mea fa'aleaoga lo outou tautiga i le galuega a le Atua.' Ia saili se pese ma fa'auma le vasega i le tatalo.

***MALO LAVA LE FA'AMALOLOSII, FA'AFETAI LE ONOSA'I, IA MANUIA TELE LE TU'UAGA.
IA MANUIA FOI LE ALO ATU O LE EKALEZIA AOA O MO LANA FONO TELE I LENEI
TAUSAGA.***

TUSIA OGA VASEGA MATUTUA – 2024
FA'ASOLOGA O MATAUPU O LE TUSI.

ASO/MASINA

MATAUPU

TUSI FAITAU

1. Fepuari 04, 2024 mai mea e tutupu”	“Faigofie le avea ma So'o po'o le a'oa'oina	Mataio 11:25-30
2.Fepuari 11, 2024	“O le Atua o le Alofa”	Kenese 2: 1-17
3.Fepuari 18, 2024	“ O tagata i se Nofoga”	Kenese 11:27-32
4.Fepuari 25, 2024	“ SUEGA MUAMUA”	
5.Mati 03,2024	“ Feagai ma Tagata tete'e”	Neemia4: 1-8
6.Mati 10,2024	“ Usita'i e Ola ai”	Ieremia 21:8-10
7.Mati 17,2024	“ Na ia auina atu ta'ilua”	Mareko 6:7-13
8. Mati 24,2024	“ Taule'ale'a talavou I Ketesemane”	Mareko 14:43-52
9.Mati 31, 2024	“ Aua tou te Matata'u”	Mataio 28:1-10
10.Aperila 07, 2024	“ La'asaga i le Fa'aleleiga: Toe Faaleleia”	Luka 19:1-10
11.Aperila 14,2024	“ Faigauo e fa'avae i le Alofa”	I Samuelu 19:1-7
12.Aperila 21, 2024	“O Loto Fuatiaifo Sa'oloto”	Galuega 16: 16-30
13.Aperila 28, 2024	“ SUEGA LONA LUA “	
14.Me 05,2024	“ Valaau e Auauna i le Atua”	II Timoteo 2: 14-26
15. Me 12, 2024	“ Upu o le Ola” (Aso o Tina)	Mataio 7: 1-12
16. Me 19, 2024	“ Talalelei mo e Sauaina”	Isaia 61: 1-3
17. Me 26, 2024	“ SUEGA LONA TOLU”	
18. Iuni 02,2024	“ O le Fafagaina o le To'a 4,000”	Mareko 8: 1-13
19. Iuni 09, 2024	“ O le Muamua e tatau ona Mulimuli”	Mareko 9: 33-37
20. Iuni 16, 2024	“ Leoleo Mamoe Lelei”	Salamo 23
21. 23, 2024	“ Iosefa, ua tuuina atu ai le Malosi Tele”	Kenese 41: 33-46
22. Iuni 30, 2024	“ SUEGA O LE AFA MUAMUA O LE TAUSAGA”	